

1 Korin

Korin nin Yesuyen alya bereya hitte Pol belej hanƙapya asan kayyin

¹ Ne Polbe Al Kurun belej dufayminde po Yesu Kristuyen mere basan al aposel hiyyen yen hoy niryin. Ningeb meten kadinin Sostenesya neya belej ² den Korin taunde nin Yesu Kristuyen alya bereya sios Al Kurun belej doyan dirde hi goya Doyan Al Kuruninin Yesu Kristu dolon irde han mar megen hike kwa kurun goya goyen goke asan gago kan har. Den Korin nin siosbe Yesu Kristu nin dufaytin sanin irke Al Kurun belej yen ge ten hoyan mun dapat dirtin han. Irde wukken wor po yiren yen hoy dirtin yen han. Yesu Kristube yen dolon irde han mar megen hike kwa kurun goya nenyat Doyan Al Kurun.

³ Ningeb Adoninin Al Kurunya Doyan Al Kurun Yesu Kristuya belej bunin dirde igin igin dirde bitin yisikamke igin hiwon yen nurde har.

Pol belej Korin nin Yesuyen alya bereya nin Al Kurun igin nurd unyin

⁴ Be, denbe Yesu Kristuya han geb, Al Kurun belej bunin dirde igin igin dirde hi. Ningeb goke ten hugin Al Kurun igin wor po nurd unen himyen. ⁵⁻⁶ Al Kurun igin nurd unen himyen gote min kurabe gahade: nen belej Yesu Kristu nin tagaltekeb mere go nurdeb bitinde

tarej hitinj hanj gwahade goyen po, denj goyen Yesu Kristuya hikeb mere tenj tenya saba fudinde bebak tenj tenya kurunj gobe iginj mat wor po titek po dirtinyen hanj. ⁷ Gwahade ninjeb Doyanj Al Kurunjininj Yesu Kristu sopte mulganj henj wawonj wor po yenj nurde goke doyanj henya Holi Spirityen tarej kawan forok yenj yenj mata goyen tumnanj yawartinj ala hanj. ⁸ Denj gwahade gobe Al Kurunj belenj saninj dirde hike kunj kunj nalu funanj forok yiyyenj. Gogab nalu funanj Yesu Kristu wanj wanj goyenterbe ultinje merem monj hinayinj. ⁹ Ninjeb nenj belenj Urminj Doyanj Al Kurunjininj Yesu Kristuya awalikde hinayinj yenj hoy diryinj al Al Kurunje yenj ge hekkej nurtek al hi.

Yesuyen alya bereya bana bipti forok yaminj

¹⁰ Be, kadne yago, denj tumnanj kadam mohonde tenj tenj mata ma tenj hinayinj. Mere tenj hinayinj kurunj goyen banabe dufay unjkurenj po kerde mere tenj hinayinj yenj gago Doyanj Al Kurunjininj Yesu Kristuyen denjemde dinenj hime. Monjo gwaha ma tinayinje denj hanj bana gonj kadam kilon gird tenj hikeb bipti forok yenayinj. Ninjeb bada henj bitinya dufaytinya unjkurenj po kerde awalikde po hinayinj. ¹¹ Kadne yago, ne ga dinenj hime gabe al kura Kloeya hanjen mar kura gore wanje dindikenj ulinj dufay budam yerde kadam mohonde tenj hanjen goke momonj niranj geb, gago dinenj hime. ¹² Denj hanj bana gonj ninj al kurabe, “Nenje Polyen saba gama irde hite,” yenj hanj. Kurabe, “Apolosyen saba gama irde hite,”

yeŋ haŋ. Irde kuratiŋbe, “Pitayen* saba gama irde hite,” munan kurabe, “Yesu Kristuyen saba gama irde hite,” yeŋ haŋ. ¹³ Daniŋ gwaha teŋ haŋ? Yesu Kristube walkaka irde hoyan hoyan irtiŋ geb, gogo teŋ haŋ? Ne Pol gare deŋ ge teŋ kuruse hende kammiriŋ? Irde ne Polyen tarende baptais tamiŋ? Moŋ, gwahade moŋ!

¹⁴ Deŋ belen mata gwahade teŋ haŋ go nurdeb ne belen haŋkapa Krispusya Gaiusya po baptais yirdeb deŋ kurabe baptais ma dirmiriŋ goke Al Kurun igiŋ wor po nurd unen hime. ¹⁵ Niŋgeb deŋ belen epte ma, “Neŋbe Polyen tarende baptais titiriŋ,” yenayiŋ. ¹⁶ Fudinde, Stefanasya yenya hanyen mar goyen wor baptais yirmiriŋ yeŋ nurde hime. Munan al hoyanbe gwaha yirmiriŋ yeŋ ma nurde hime. ¹⁷ Yesu Kristu belen nad nerke deŋ hitte kumiriŋ gobe al baptais yird yird niŋ ma kumiriŋ. Gwahade yarabe yeŋ ge yitiŋ mere igiŋ goyen tagal tagal niŋ kumiriŋ. Kuŋ tagalde henyabe moŋgo Yesu Kristu kuruse hende kamyiŋ gote saŋiŋbe hubu hiyyenkek yeŋbe megen niŋ alyen dufay wukkek yeŋ hanyen goyen ma gama irde tagalde hinhem.

Yesu Kristube Al Kurunyen tarenya dufay wukkeky minyan

¹⁸ Be, Yesu kuruse hende kamyiŋ gote merebe megen niŋ alyen dufay gama irde kame kak alare kutek marbe kukuwamneŋ nurde haŋ. Goyen-poga neŋ Al Kurun belen dumulgan titiŋ marbe mere gobe mataniniŋ gergeŋ ird ird tareŋ minyan

* **1:12:** Deŋem hoyanbe Sifas.

yeŋ nurde hite. ¹⁹ Kukuwamŋeŋ nurde haŋ mar gokeb Al Kurunyen asanđe mere gahade katiŋ hi: “Al kura, ‘Neŋbe megen niŋ dufay wukkekniniŋ yaŋ,’ yeŋ haŋ marte dufay wukkeek goyen gwamuŋ yureŋ.

Irde ‘Keŋkela bebak teŋ teŋ saŋiŋniniŋ yaŋ,’ yeŋ haŋ marte bebak teŋ teŋ tareŋ goyen teŋ siŋa ireŋ,” yitiŋ hi. *Aisaia 29:14*

²⁰ Niŋgeb megen niŋ dufay wukkeek miŋyaŋ albe Al Kurun diliŋde meten iŋiŋ dahade teŋ haŋ? Saba teŋ teŋ marbe Al Kurun diliŋde meten iŋiŋ dahade teŋ haŋ? Irde gayenter dufay gergeŋ forok yirde al biŋ yawarde haŋ marbe Al Kurun diliŋde meten iŋiŋ dahade teŋ haŋ? Hubu wor po! Al Kurun beleŋ megen niŋ alyen dufay wukkeek yeŋ hanyen goyen kukuwamŋeŋ wor po iryiŋ. ²¹ Niŋgeb megen niŋ alyen dufay go gama irde haŋ marbe epte ma Al Kurun nurd untek yiryiŋ gobe Al Kurun beleŋ dufaymiŋ wukkeek kerde gogo gwahade yiryiŋ. Irde mere tagal-tekeb megen niŋ al beleŋ mere kukuwamŋeŋ yeŋ hanyen goyen al kura beleŋ mereniniŋ goyen nurde Yesu Kristu niŋ dufaymiŋ tareŋ irnayiŋ marbe yad yad niŋ Al Kurun beleŋ amanen nurde dufay gogo kiryiŋ.

²² Yuda marbe mata tiŋeŋ Al Kurun beleŋ po ga irtek goke po naŋkeneŋ haŋ. Grik marbe megen niŋ alyen dufay wukkeek goke po naŋkeneŋ haŋ. ²³ Gega neŋbe Yesu Kristu kuruse hende kamiŋiŋ goke po tagalde hite. Goyenbe Yuda marbe Mesaiabe gwahade mat ma kamiŋeŋ yeŋ nurde hanyen geb, gwahade nurde hanyen gore Yesu Kristu niŋ yitiŋ mere goyen bebak teŋ

teŋ belneŋ pet tike mata bulunde kateŋ haŋ. Irde Yuda mar moŋ al miŋ hoyanbe Yesu Kristu niŋ yitiŋ mere gobe kukuwamneŋ nurde haŋ. ²⁴ Goyenpoga al kura Al Kurun beŋeŋ basiŋa yirtiŋ marbe Yesu Kristu beŋeŋ Al Kurunyen saŋiŋya dufay wukkeky a goyen kawan yiryiŋ yeŋ nurde haŋ. Yuda mar kura Al Kurun beŋeŋ basiŋa yiryiŋ marbe gwahade nurde haŋ. Al miŋ hoyan Yuda mar moŋ goyen Al Kurun beŋeŋ basiŋa yirtiŋ mar wor gwahade po nurde haŋ. ²⁵ Megen niŋ marbe Yesu kuruse hende kamiŋ gobe Al Kurunyen dufay po gama irde gogo tiyyiŋ mere goyen nurdeb Al Kurunyen dufay gobe kukuwamneŋ yeŋ nurde haŋ. Gega Al Kurunyen dufaybe alyen dufay gote folek geb, gogo Yesu kuruse hende kamde Al Kurunyen dufay wukkeŋ goyen kawan iryiŋ. Megen niŋ marbe Al Kurunyen tareŋbe kurun moŋ geb Yesu keneŋ unan tike kuruse hende kamiŋ gogo yeŋ nurde haŋ. Gega Al Kurunyen tareŋbe alyen saŋiŋ gote folek geb, gogo Yesu kuruse hende kamiŋ gega sopte isan heŋ tareŋmiŋ kawan iryiŋ.

²⁶ Be, kadne yago, haŋkapa Al Kurun beŋeŋ hoy ma diryiŋyabe megen niŋ marte diliŋdeb dahade hinhan goke dufay henaŋ ko. Deŋ dunŋkureŋ dunŋkureŋ po ga megen niŋ alyen dufay wukkeŋ yeŋ hanŋyen go miŋyan hinhan. Irde deŋ bana goŋbe al deŋem yanbe budam ma hinhan. Doyan mar wor budam moŋ. ²⁷ Goyenpoga Al Kurunbe megen niŋ alyen dufay wukkeŋ goyen goniniŋ yan yeŋ haŋ mar memya henaŋ yeŋbe dufay go miŋmoŋ mar basiŋa yiryiŋ. Irde al tareŋniniŋ

yaŋ yeŋ haŋ mar memya henaŋ yeŋbe saŋiŋ miŋmoŋ mar basaŋa yiryiŋ. ²⁸ Irde megen niŋ mar beleŋ al kura gogo yeŋ ma yeneŋ hanŋyen irde al denem moŋ yineŋ hanŋyen mar goyen Al Kurun beleŋ basaŋa yiryiŋ. Al Kurunbe megen niŋ mar beleŋ det kurun yeŋ nurde haŋ det gobe gwamun yurde det titmiŋeŋ yeŋ nurde haŋ det gobe basaŋa yiryiŋ. ²⁹ Gogab al kura beleŋ epte ma Al Kurun diliŋde yiŋgeŋ ge turun turun teŋ hinayiŋ. ³⁰ Goyenpoga denbe Al Kurun beleŋ basaŋa diriŋ geb, Yesu Kristuya haŋ. Yesu Kristube dufay wukke Al Kurun hitte mat watiŋ gote miŋ al heŋbe dufay wukke dunen hi. Yeŋbe gwahade geb, neŋ gayen dufay wukke go dunenbe mata bulun de mat dumulgaŋ tiye yeŋ nende gasun teŋ kamiŋ. Irde Al Kurun diliŋde al huwak, irde wukke wor po diriŋ. ³¹ Niŋgeb goke teŋ Al Kurunyen asaŋde gahade katiŋ hi:

“Al kura yiŋgeŋ ge turun turun tiye yeŋbe Doyan Al Kurun po ga turun iryen,” yitiŋ. *Yeremaia 9:24*

2

¹ Be, kadne yago, haŋkapa den hitte kun gor henyaŋbe Al Kurunyen dufay banare hinhin goyen kawan irde momoŋ dirde hinhem. Gwaha dirde henyaŋbe mere al beleŋ hapek yaŋ nurtek mat ma momoŋ dirde hinhem. Irde megen niŋ alyen dufay wukke yeŋ hanŋyen go hende huwarde ma momoŋ dirde hinhem. ² Go dirde hinhem gobe denya henya det hoyan hoyan niŋ ma nuren, Yesu Kristu niŋ po nuren, irde yeŋ kuruse hende kamiŋ goke po nuren yeŋ dufay

heñ hinhem geb, gogo dirde hinhem. ³ Ne denya hinhetyabe Al Kurunyen metenbe kurun geb, nigen tareñner epte moñ yeñ nurde hinhem. Irde moñgo metenmin bulun ireñ yeñbe kafura heñ barbar wor po yeñ hinhem. ⁴ Ningeb Al Kurunyen mere tagalde saba dirde heñyabe megen nin alyen dufay wukkek, kirminñin de hapek yan nurtek goyen gama irde ma tagalde hinhem. Gwaha titñenbe Holi Spirityen sanñin de meten ten himeke gote igineñ kawan forok yeñ hinhan. ⁵ Go ten hinhem gobe dufaytin Yesu nin tareñ iramin goyen megen nin alyen dufay wukkek yeñ hanñen go hende moñ Al Kurunyen tareñ de dufayninin sanñin irtirin yeñ nurnayin yeñbe gogo Holi Spirityen tareñ de meten ten hinhem.

Dufay wukkekbe Holi Spirit beñ duney hi

⁶ Be, neñ Al Kurunyen mere tagal tagal marbe Yesu gama ird ird matare parguwak yara hitin mar goya heñ Al Kurunyen dufay wukkek goke saba tagalde hite. Goyenbe megen nin alyen dufay wukkek yeñ hanñen go hende ma tagalde hite. Irde megen nin doyan mar kame hubu henayin gote dufay wukkek yeñ hanñen go hende huwarde ma tagalde hite. ⁷ Gwaha titñenbe Al Kurunyen dufay wukkek banare hitin bebak titek moñ goyen tagalde hite. Al Kurunyen dufay wukkek gobe kame nalu funande denñinin turnun yan heñ heñ ge Al Kurun beñ hanñapya wor po megen ga forok ma yekeya ep irin go goyen. ⁸ Dufaymin wukkek gobe megen nin doyan mar beñ bebak ma tiyamin. Bebak tiyamin manhan Doyan Al Kurun tareñmin

turɲuɲ yaɲ wor po goyen kuruse hende ma mayke kamwoɲ. ⁹ Goyenbe go mar gore gwaha tinayin yenbe bikken Al Kurunyen asanɲeb gahade katiɲ:

“Al Kurun belen yen ge amanen nurd unen han mar nin det gitik ten yunyin gobe megen nin marbe dilinge ma kennayin, kirminde ma nurnayin, irde epte ma det go forok yenayin yen nurde hinayin,” yitin hi. *Aisaia 64:4*

¹⁰ Goyenbe nen hittebe Al Kurun belen Holi Spirit inke det goyen dikala diryin. Holi Spiritbe det tumɲan yenen kenkela nurde bebak ten hiyen. Al Kurunyen dufay banare wor po hi goyen manan kenkela nurde bebak ten hiyen geb, gogo Al Kurun belen inke nen hitte wan dikala diryin.

¹¹ Be, ganun al belenbe kadomde dufay goyen epte kenen bebak tiyyen? Hubu wor po. Al goyen yingen po gab dufaymin goyen nurde hiyen. Gwahade goyen po, al kura belen Al Kurunyen dufay epte ma nuryen. Al Kurunyen dufaybe Holi Spirit po gab nurde hiyen. ¹² Nenbe megen nin mar belen dufay hen han gwahade ma dufay hen hite. Gwahade yarabe da detbe Al Kurun belen murungem mon dulin duntin goyen bebak tinayin yenbe Holi Spirit Al Kurun hitte mat watin go po gab nen hitte hi. ¹³ Niɲgeb mere tagalde hite gobe megen nin alyen dufay wukkeken yen hanjen go hende huwarde ma tagalde hite. Gwaha titnenbe Holi Spirit belen saba dirtin go hende huwarde tagalde hite. Niɲgeb mere fudinde Holi Spirit belen yitin goyen Holi Spirityen yufuk

bana hañ mar goyen nurde bebak tinayin yey momon yirde hite. ¹⁴ Gega al kura Holi Spirityen yufuk bana ma heñ megen nin dufay po gama irde hañ marbe mataya mereya Holi Spirit belen forok yirde hi goyen epte ma yenen bebak ten kukuwamnen po nurde hinayin. Niñgeb mel gobe mataya mereya Holi Spirit belen forok yirde hi goyen ma yade hañ. Gobe Holi Spirityen yufukde hañ mar belen po gab yenen bebak ten hañ geb, gago dinen hime. ¹⁵ Goyenbe Holi Spirit yufuk bana hi albe mataya mereya kurun goyen igin ma bulun goyen igin yenen bebak ten hiyen. Gega al gobe al mali hoyan kura belen epte ma al igin ma bulun innayin. ¹⁶ Gokeb Al Kurunyen asande gahade katin hi:

“Ganun al belen Doyan Al Kurunyen dufay kenen bebak ten hi? Hubu wor po.

Ganun al belen igin saba iryen? Epte mon,” yitin.

Aisaia 40:13

Goyenpoga nenbe Yesu Kristuyen dufay kenen bebak ten hite.

3

Yesuyen alya bereya yingen ulin fitfut tiyamin goke yirin

¹ Be, kadne yago, denya hinhemyabe den goyen bitinde Holi Spirit belen sanin meten ten hi yey ma denen hinhem. Dufaytinbe Yesu Kristu nin taren iramin gega, bitin banabe megen nin dufay belen po kurun hike denenbe dirin muknen dufaymin hako po hañ goyen saba yirtin yara dirde hinhem. ² Dirin muknenbe binje taren epte ma

netek geb, mamu po nene hanjen. Niñgeb den wor gwahade goyen denenbe saba sanjñ ma dirde hinhem. Gayenter wor bikkeñ hinhan gwahade po hañ. ³ Gobe bitij banabe megen niñ dufay po kuruj hi geb, gwahade po hañ. Ga dinen hime gabe den bana goñ kadtiñ igiñ mat hike yenenbe goke bitij ar yeñ hi, irde kadom mohonde teñ hañ geb, gago dinen hime. Den mata gwaha teñ hañ gobe bitij bana megen niñ dufay po kuruj hi geb, mata gogo teñ hañ. Holi Spirit miñmoñ marte mata gama irde hañ geb, gogo teñ hañ. ⁴ Ga dinen hime gabe kuratiñ belej, “Neñbe Polyen saba gama irde hite,” yeñ hañ, irde kura belej, “Neñbe Apolosyen saba gama irde hite,” yeñ hañ gobe Holi Spirit miñmoñ marte mata geb, gogo megen niñ marte mata po teñ hañ dinen hime. ⁵ Metenðerebe Al Kuruj belej hoyañ hoyañ dunyiñ. Niñgeb Apolosbe ganuj? Irde Polbe ganuj? Deyyabe tumñañ Al Kurujyen meten mar uliñ po. Niñgeb den ge meten tiyyekeb gogo Yesu niñ dufaytiñ taren iramiñ. ⁶ Gwahade geb ne Polbe det muyken tur irtij yara den bitij bana Al Kurujyen mere goyen kirmiriñ. Irkeb Apolos belej Al Kurujyen mere go kuruj hiyyen yeñbe det hartij go fe yunen doyañ yirde hañ yara doyañ irde hinhin. Goyenbe det hartij go forok irde kuruj ird ird albe Al Kuruj, yeñ unñkuren po. ⁷ Niñgeb Al Kurujyen mere al binde tur ird ird alya mere go fe unen doyañ ird ird alyabe turuj yirtek moñ. Mere go kuruj ird ird al Al Kuruj yeñ muñ po gab turuj irtek. ⁸ Munañ Al Kurujyen mere al binde hard hard alya mere go

kurunj henj henj ge doyanj ird ird alya gote metenbe hoyanj hoyanj monj. Al Kurunj dilindeb unjkurenj po. Goyenbe metenj nende gigen yuntinj gote murungembe kame metenminj gote iginej dahade forok yitinj goyen yenej gab murungem gwahade po yunyenj. ⁹ Fudinde, neya Apolosyabe tumnanj Al Kurunj ninj tenj metenj tenj har. Munanj denjbe Al Kurunyen binje metenj yara. Irde Al Kurunyen ya balem go gwahade goyen.

¹⁰ Be, Al Kurunj belenj buninej dirde iginj iginj diryinj geb, al kura ya ird ird mata nurde pasi hitinj al gore kenkela po tola yimiyyenj gwahade yara nebe denj hitte kunj Yesuyen alya bereya sios forok ird ird metenj minj urmirinj. Irkeb al hoyanj belenj metenj timirinj go hende sios forok irde hanj. Mata gobe tola yimiytinj go hende al hoyanj belenj ya irde hanj go gwahade goyen. Goyenbe tola yimiytinj go hende ya irde hanj marbe daha mat ya go irde hanj goke kenkela nurde ga irde hinayinj. ¹¹ Tola tarej hanjkapyo timiytinj tola gobe Yesu Kristu. Ningeb al kura tola hoyanj kura sopte ma yimiyyenj. ¹² Yesu Kristu hitte mat sios forok irde hanj marte metenminj kurabe iginj wor po, kurabe iginj wor po monj. Gobe al belenj ya yirtinj yara. Al kurabe gol, kurabe silwa, kurabe hora damum hende wor po yade ya yirnayinj. Irde al kurabe he, kurabe yamunj, kurabe hunj belenj po ya yirnayinj. ¹³ Irde kunj kunj al iginja bulunya pota yird yird nalu funanj forok yeke ya yirtinj go kak belenj kumga tike gab ya yirtinj mar bana ganunyen metenbe iginj, munanj ganunyen metenbe iginj wor po monj goyen kawan

forok yiyyen. ¹⁴ Kak belen kumba tiyyen gega, ya daminbe sanin hiyyen gobe ya go iryin albe gote murungem tiyyen. ¹⁵ Munan ya go humga kukeb ya go iryin al gote murungembe hubu geb, bin misin nuryen. Yingenbe Al Kurun belen ten gasunminde kiryen. Gega al gobe yamin humga kuke detmin tumnan ya binde yubul ten busa-harde ulin ulin po hiyen go gwahade metenmin gote murungembe hubu wor po hiyyen.

Yesuyen alya bereyabe Al Kurunyen ya balem

¹⁶ Be, den Yesuyen alya bereyabe Al Kurunyen ya balem, irde Holi Spirit den bana hi goyen ma nurde han? ¹⁷ Al Kurunyen yabe balem wor po, irde denbe ya balem gogo geb, al kura belen Al Kurunyen ya go bulun iryenbe Al Kurun belen al go gwamuɗ uryen.

Megen nin alyen dufay wukkek yen hanyen gobe Al Kurun dilinde det dirnen wor po

¹⁸ Be, denbe dindiken usi ma yirde hinayin. Ningeb den han bana al kura belen yingen ge yenbe, “Nebe megen nin alyen dilinde dufay wukkek minyan al yen nenen han,” yen nurde hi kenem dufay go tubul po tiyyen. Gwaha ten hike megen nin mar belen kukuwamnen kenen hinayin gega, Al Kurunbe dufay wukkek minyan yen kinyen. ¹⁹ Megegen nin alyen dufay wukkek yen hanyen gobe Al Kurun dilinde kukuwamnen kenen hiyen geb, gogo Al Kurunyen dufay wukkek gama irde hiyen al gobe dufay wukkek fudinde go minyan yen kinyen. Goke tenbe Al Kurunyen asande gahade katin hi:

“Al kura, ‘Nenbe megen niŋ alyen dufay wukkek goniniŋ yaŋ,’ yeŋ haŋ marbe
Al Kurun beŋ dufaymiŋ tigiri tikeb yinŋeŋ
go po buluŋ yirde hi,” yitiŋ. *Yop 5:13*

²⁰ Irdeb sopte mere kura katiŋbe gahade:

“Doyaŋ Al Kurunbe megen niŋ alyen dufay wukkek yeŋ hanŋyen gobe gote igineŋ miŋmoŋ yeŋ nurde hi,” yitiŋ hi. *Tikiŋ 94:11*

²¹ Niŋgeb deŋbe al kura turuŋ irde, “Nenbe al goyen gama irde hite,” ma yeŋ hinayiŋ. Det tumŋaŋbe dende geb, gago momoŋ dirde hime. ²² Ne Polya Apolosya Pitayabe tumŋaŋ deŋ Yesuyen alya bereyat metenŋ mar. Megeŋ ga manaŋ dende megeŋ. Irde heŋ henya kamde kamdeya, det haŋka haŋ gaya kame hinayiŋ goya kurunŋ gobe tumŋaŋ dende. ²³ Irde deŋbe Yesu Kristuyen alya bereya. Irde Yesu Kristube Al Kurunyen.

4

Yesu Kristuyen mere basanŋ mar

¹ Be, gwahade niŋgeb, deŋbe neŋ gayen Yesu Kristuyen metenŋ mar, irde Al Kurun beŋ dufaymiŋ banare hitiŋ goyen kawan ird ird metenŋ yuntiŋ mar yeŋ denenŋ hinayiŋ. ² Goyenbe neŋ Yesuyen metenŋ mar beŋ titek mata kurabe Al Kurun beŋ metenŋ duntiŋ goyen bininiŋde mat fudinde wor po keŋkela metenŋ titek go goyen. ³ Goyenpoga metenŋ go teŋ henyaŋbe deŋ beŋ daw ma al hoyan beŋ daw metenŋnaya mataneya goke igiŋ ma buluŋ ninnayiŋ goke kandukŋeŋ ma

nurde himyen. Nigen wor metenneya mataneya goyen igiñ wet ma buluñ wet goyen goke ma yeñ himyen. ⁴ Ne benerbe metenya mataya teñ hime kurun gobe igiñ ala po teñ hime yeñ nurde himyen. Gega Al Kurun diliñdebe buluñne kuram moñ ma yewen. Al Kurun yeñ unjkuren gore po gab igiñ teñ hime ma buluñ teñ hime goyen momoñ niryen. ⁵ Niñgeb meten marminde metenya mataya goyen igiñ ma buluñ yinen yinen nalube hako hi geb, aran po gwaha ma yinen hinayin. Nalu funande gab Doyan Al Kurun belen wan gwaha yinyen geb, gayenter den belen gwaha ma yinen hinayin. Goyenter gab Doyan Al Kurun belen alyen mataya metenya kidoma bana hike epte ma kenkela yentek yara goyen kawan ird ird hulsi teñ wayyen. Irdeb al binde dufay kerde hitin goyen wor kawan iryen. Irke gab Al Kurun belen meten marmin nende gigen meten titin gote murungem yunen turun yiryen.

⁶ Be, kadne yago, saba dirhem gayen den belen nurde kenkela bebak tinañ yenbe neya Apolosyat ulderer mere gago teñ hime. Gogab den belen neya Apolosyat mata kenenbe, “Al Kurunyen asande katin go po gama irde hinayin. Mere hoyan gor ma han gobe gama ma irde hinayin,” yeñ hanyen gote min nurnayin. Gwaha tinayinbe al kura gama ird ird goke yingen turun turun tenbe al hoyanbe buluñ mat tagal unen unen mata go ma teñ hinayin. ⁷ Goyenpoga dindigen ge yeñ nenbe igiñ yeñ nurdeb al hoyanbe buluñ yinen yinen tarenbe ganun belen dunkeb gogo teñ han? Det budam den hitte han kurun gobe

Al Kurun belen ma duntin? Goyenbe danin Al Kurun belen ma duntin yen nurdeb dindiken ge turun turun ten han?

⁸ Be, denbe Al Kurunyen saba nin binje kamtinen ten hinhan goyen bikken tumnan nurde pasi hitin yen nurde han. Irde al kura horam yan belen det kuran ma nurde han yara Holi Spiritiyen tarenbe bikken titin gogo ep yen nurde han. Irde doyan mar karkuwan hitin yen nurde han, irdeb nen Yesuyen mere basan mar gayenbe denem minmon yen nurd dunen han. Goyenbe den goyen gwahade hetek nalube hako po hi. Yesu Kristu sopte mulgan hen wan wan nature gab alya bereyamin gobe doyan mar karkuwan henayin. Ningeb fudinde wor po, den goyen doyan mar karkuwan hewon yen nurde hime. Gogab nen wor denya tumnan doyan mar karkuwan hinin. ⁹ Gega gayenter nen Yesuyen mere basan marbe al kura mata bulun wor po tike al buda kurun dilinde gasa yirke kamtek marte gasunde gor den ge ten Al Kurun belen dirtin yara nurde hime. Ningeb alya bereya megen han kurun goya Al Kurunyen miyonya tumnan nen hitte kanduk dahade forok yenayin yen denen han. ¹⁰ Gwahade ningeb, nenbe Yesu Kristu nin tenbe kukuwa hite, munan denbe Yesu Kristuya henbe dufay wukke minyan han. Irde nenbe yulkek hite, munan denbe sanintin yan. Denbe al belen al denem yan yen denen palap dirde han, munan nen gabe al siksuknen yen palap ma dirde han. ¹¹ Fudinde, nenbe meten min urtirinde mat wan wan ga hite gayenterbe

binje nin kamde, fe nin kamde, ulnininj umña minjon, irde al belen bulun bulun wor po dirke ulnininj misinj katenj hityen. Irde yanininj minjon geb, kurar mat kurar kunj kunj tenj hityen. ¹² Neñbe binje nin nurdeb nindikenj metenj kurun tenj gab yade hityen. Al kura belen karan durkeb neñbe Al Kurunyen tarenje guram yirde tarenj yirde hityen. Al kura belen bulun bulun dirkeb goke mukku ma tenj goya goya metenj tenj hityen. ¹³ Al kura mere bulun mat dirkeb neñbe iginj mat wol heñ yunenj hityen. Minde mat wan wan hanja hite gayenter neñbe det bulun kura yimiytinjen dirtek yara hite.

¹⁴ Gwaha dinmekeb memya henanj yenj ma asanj ga kanj dunenj hime. Gwaha dirtinjenbe denj goyen dirinje yago yara geb, bener mat denj ge amanenj wor po nurdeb gago nurde ga hinayinj yenj saba dirde hime. ¹⁵ Yesu Kristu ninj saba dird dird marbe budam wor po hanj. Goyenbe adotinj yagobe budam gwahade ma hanj. Ne wa kunj Yesu Kristu ninj yitinj mere goyen momonj dirmeke yenj ge dufaytinj saninj iraminj geb, nebe Yesu Kristuya henjebe denj kurunj gote adotinj yara himirinj. ¹⁶ Ninjgeb nere mata po kenkela gama irde hinayinj yenjebe gago batbat dirde hime. ¹⁷ Goke tenjebe Timoti gogo denj hitte tenj kermeke kuyenj. Yenjebe urne yara, bubulkunje wor po yenj nurd unenj himyen. Yenjebe binje mat fudinde wor po Doyanj Al Kurunj ninj metenj tenj hiyen. Yenj belen gab ne gayen Yesu Kristuya henj mata dahade tenj himyen goke momonj dirke bitinj bak yiyyenj. Yenjebe ne belen Yesuyen alya bereya sios megen hike kwa

kurun goyen saba yirde himyen gwahade goyen po momon diryen.

¹⁸ Goyenbe den han bana goyen kuratin kurabe, “Polbe sopte ma wan dinyen,” yen nurdeb nen nurhet nurhet ten han. ¹⁹ Gega Doyan Al Kurun belen igin ninkeb hen ga hen ga ma tiyen, goyare po kun denen. Kun gab parpar ten han mar goyen mere dahade ten han, irde taren daminde mata gogo ten han yen kenkela yenen bebak tiyen. ²⁰ Al Kurun belen alya bereyamin doyan yirde hi gobe merere po mon, tarenminde doyan yirde hi. Ningeb kun gab mel go sanin daminde mata gogo ten han goyen yenen. ²¹ Ningeb kun daha dirmeke gab igin yen nurnayin? Bearar hende kwep kwep diren ma, bekkende igin mat mere direnbe igin?

5

Mata bulun ten han mar hayhay yirde hinayin

¹ Be, den han bana gon alya bereya kura leplep mata ten han gote mere momon nurmin. Al kura naninde beremya duwan ten har gobe Al Kurun ma nurd unen han mar wor mata gwahade ma ten hanyen. ² Goyenpoga denbe mata gwahade forok yen hi goke bulunen ma nurde tumnan Al Kurun dilinde igin po hite yen dindiken ge turun turun ten han. Mata bulunmin goke bitin misin nurde esenbe mata bulun titin al goyen denya epte ma awalik hetek yen takira titek yarabe gwaha ma irde han. ³ Nebe denya gor ma hite gega, dufaynerbe denya gor hite. Ningeb nigen gor hime yara tenbe mata go tiyun al

gob bikkeñ mata bulun tiyañ inmin. ⁴⁻⁵ Niñgeb den beleş Doyañ Al Kurunniñ Yesu Kristu niñ teñ gabu irdeb al go takira tike Satan yufukde heñ kanduk yeneñ hiyeñ. Dufaynebe den gabu irde hinayinde gor denya hiyeñ, irde Doyañ Al Kurunniñ Yesu Kristuyen tareñ manañ den hitte hiyeñ geb, igiñ gwaha tinayin. Gogab al go kanduk bana henyañbe mata bulun timin yeñ bebak teñbe megen niñ dufay bulun go tubul tikeb kame Doyañ Al Kurun wañ wañ nalureb al go tumulgañ tiyyeñ.

⁶ Niñgeb mata bulun gwahade goyen den bana hikeya dindikeñ ge turun turun ma teñ hinayin. Denbe yis dirneñ muñ kura palawa bana kerkeb gore hilyañ kuñbe palawa ditdi niyyeñ go goyen ma nurde hañ? ⁷ Nurde hañ kenem mata bulunñ gobe yis girmaneñ hitin yara geb, goyen yade siña yirnayin. Irkeb denbe palawa gergeñ yis gam moñ yara Al Kurun dilinde wukkeñ hinayin. Yesu Kristu beleş mata bulunñ halde duneñ yeñ Pasobare niñ sipsip dirneñ yara* heñ kuruse hende kamyin geb, denbe mata bulunñ minmoñ mar hitin hañ. ⁸ Niñgeb neñbe megen henyañbe dufay bulunya mata bulunya yis bikkek yara goyen yubul po teñ mata wukkekya mere fudindeya po teñ hitek. Go teñ hitek gobe Israel mar beleş Pasoba nalure beret yis minmoñ nene hanyen gwahade goyenbe gogo.

* **5:7:** Bikkeñ Israel mar Isip naña tubul teñ Kenan kunin tiyamiñyabe Al Kurun beleş sipsip al dirin dirneñ gasa yirde darim yade yame kantayan sam yirnayin yinyin. Pasoba Sipsip Dirneñbe alyen gasun teñbe kamyin al Yesu niñ yitin.

⁹ Be, hakot kura ne belen asan̄de al wet kura ma bere wet kura leplep mata ten̄ hikeb go mar goyen awalik ma yirde hinayin̄ yen̄ kan̄ dunmirin̄.† ¹⁰ Go dinmirin̄ gote min̄be leplep mata ten̄ han̄ mar, det ug po yad yad nin̄ po dufay hen̄ han̄ mar, al hoyan̄ gasa yirnin̄ yirnin̄ yirde kawe yirde han̄ maryabe det tonen̄ al belen̄ yirtin̄ dolon̄ yirde han̄ mar goya ma po hinayin̄ yen̄ ma dinmirin̄. Munan̄ go mar goya ma hitek yen̄be go yilwa yirdeb kun̄ damde hinayin̄? Gor kura hitek min̄mon̄. ¹¹ Nin̄geb asan̄ ga kan̄ dunen̄ hime gabe den̄ han̄ bana al kura belen̄, “Nebe Yesu gama irde hime geb, nebe kadtin̄,” dinen̄ hiyen̄ gega, mata bulun̄ kura ten̄ hikeb yen̄ya ma awalik hen̄ hinayin̄ yen̄be gago kan̄ hime. Mata bulun̄ gobe gahade: leplep mata, det ugun̄ po yad yad nin̄ po dufay hen̄ hen̄ mata, un̄gura dolon̄ yirde yirde mata, mere bulun̄ mat ten̄ ten̄ mata, kukuwa fe nene kukuwa hen̄ hen̄ mata, irde al gasa yirnin̄ yirnin̄ yirde kawe yird yird mata. Den̄ han̄ bana al kura mata bulun̄ gwahade ten̄ hike yenen̄be awalik ma po irde hinayin̄. Dula wor yen̄ya ma po ten̄ hinayin̄.

¹²⁻¹³ Al Yesu ma nurd unen̄ han̄ mar gore mata bulun̄ ten̄ han̄ goke merem yan̄ yird yird gobe nere samun̄ mon̄ geb, matamin̄ goke ma nurde hime. Mata bulun̄min̄ gobe Al Kurun̄ belen̄ gab merem yan̄ yiryen̄. Goyenpoga den̄ han̄ bana goyen al kura belen̄ mata bulun̄ tikeb ganun̄ mar belen̄ gab goke innayin̄? Den̄ gog po geb. Goke

† **5:9:** Pol belen̄ asan̄ budam kayyin̄ goyen Baibelde ma han̄ goyen bana mere tiyyin̄ gokeb gago yen̄ hi.

tenje, “Den hañ bana goyen al kura mata bulun ten hike keneñbe al go takira tinayin. Irkeb denya ma hinayin,” yen hañ.

6

Kadom merere gerd gerd ma ten hinayin

¹ Be, dindigen bana gon al kurabe kadomya kanduk minyan go sope irye yenbe daniñ Al Kurunyen alya bereya hitte ma kunbe megen nin marte mere nurd nurd al hitte kun hañ? Mata gwahade titek mon goyen daniñ gwaha ten hañ? Gobe bulun wor po! ² Denbe kame nalu funandebe neñ Al Kurunyen alya bereya belen megen nin mar merere yerde matamin goke yintek goyen ma nurde hañ geb, gogo mata gwahade ten hañ? Irde den belen kame megen nin mar merere yerde matamin goke yintek hañ kenem den bana kanduk dirnen mun kura forok yitin goyen dindiken epte ma kanduk go sope yirnayin? ³ Denbe nalu funande Al Kurunyen miyon mata bulunde katen uncura hitin goyen wor nenya denya belen merere yerde matamin goke yintek yen ma nurde hañ geb, gogo mata gwahade ten hañ? Nenbe kame mata kurun goyen wor igin titek kenem det dirnen megen henya neñ bana kadnininya kanduk forok yen hañ gobe epte sope yirtek. Goyenbe gwaha ma ten hañ! ⁴ Denbe dindiken bana kanduk kura goke kadom mohonde titek goyen forok yekeb kanduk go sope irnin yenbe daniñ megen nin mar Yesuyen alya bereya yenenminbe sios bana denem mon yen yenen hañ mar hitte yad kun

hañ? ⁵ Ga dinen hime gabe nurde memya henan yenbe gago dinen hime. Den Yesu nin dufaytin tareñ irtin mar bana gonbe kanduktin sope ird ird al kuram mon? ⁶ Hubu ningeb gogo dindiken ulin kadam igin ma nurd gunen tenbe merere yirnin yen Yesu nin dufaymin sanin ma irde hañ mar dilinde yukun hañ?

⁷ Fudinde, den hañ bana kadtiya kanduktin minyan goyen megen nin marte merere yerteke sope irnayin yen al sinare nin hitte yukun hañ gobe Al Kurun dilinde bikken soñ hañ yen denen hi. Ningeb gwaha ma ten hinayin. Kadtin belen usi dirde bulun bulun dirde hike gonmin gon gwaha dirde hinan yen hinayin gobe igin yen nurde hime. ⁸ Neb gwaha dinen hime goyenbe fudinde wor pobe al usi yirde bulun bulun yirde hañ marbe al hoyan mon den gogo yen nurde hime.

⁹ Denbe mata bulun ten hañ marbe Al Kurun belen alya bereyamin doyan yirde hi bana gon epte ma hurkunayin goyen ma nurde hañ? Ningeb al kura belen usi diryenkek geb, kenkela hen ga hinan ko. Mata bulun gobe gahade: lelep mata, unğura dolon yird yird mata. Irde al kura berem yan gega bere hoyanya duwan ten ten mata, al belen belen nin bere yara hen hen mata, irde al dirin yingen po ulin gabu ird ird mata. ¹⁰ Irde kurabe kawe mata, det ug po yad yad nin po dufay hen hen mata, kukuwa fe nene kukuwa hen hen mata, al mere bulun mat yird yird mata, irde al gasa yirnin yirnin yirde kawe yird yird mata. Al mata gwahade ten hañ mar gobe epte ma wor po Al Kurun belen alya

bereyamiñ doyañ yirde hi bana goñ hurkunayin. ¹¹ Bikkenbe deñ hañ bana goyen al kurabe mata gwahade teñ hinhan. Goyenpoga Doyañ Al Kurun Yesu Kristuya Holi Spiritya beleñ mata bulunñtin goyen halde dunenbe Al Kurun diliñde wukkek wor po dirde al huwak dirtin hañ.

Ulnin kenkela doyañ yirde Al Kurun turun ir-nayin

¹² Be, deñ hañ bana goyen al kura beleñ, “Neñbe mata kura tinin yenbe igin ala titek,” yen hanyen. Gega mata go tinayin gore huginñtin igin dirnayin yen ma nurde hinayin. Niñgeb nebe mata kura tiye yenbe igin ala tiyen gega, mata gore epte ma nanarde boñ yiyyen. ¹³ Irde kuratin kurabe, “Biñgebe bininin makin ird ird det, irde binininbe biñge sola urd urd nin po,” yen hanyen. Gega kamebe Al Kurun beleñ det irawa goyen tunñan mugol kiryen. Goyenbe hanƙapya Al Kurun beleñ alya bereyat ulin yiryin gobe min minyan yiryin. Ulnininbe lelep mata teñ teñ ge ma yiryin. Gwaha titnenbe Doyañ Al Kurun denem turnun yan ird ird nin yiryin, irde Doyañ Al Kurunbe ulninin guram yirde taren yird yird nin hi. ¹⁴ Al Kurun beleñ Doyañ Al Kurun Yesu ulninin gake teñ kamyin goyen sopte isan hirin. Niñgeb kame neñ wor tarenminde kamtinde mat disan hiyyen. ¹⁵ Denbe Yesu Kristuyen ulin pigin yara hañ geb, kuratin kurabe Yesuyen hanin, kurabe kahan hitin hañ goyen nurtin ala teñ hañ. Gega neñ Yesu Kristuyen ulin pigin hitin gayen igin kurhan kura teñ belen nin bere sikkenya gabu irtek? Epte moñ. ¹⁶ Al Kurunyen asanbebe,

“Alya bereya waŋ gabu henbe uliŋ unjkuren hiyyen,” yitiŋ hi. Niŋgeb al kura belen niŋ bereya gabu hiriryenbe bere goya uliŋ unjkuren hiyyen go goyen ma nurde haŋ? ¹⁷ Goyenbe al kura Doyaŋ Al Kurun niŋ dufaymiŋ saŋiŋ iryen al gobe tonenbe Doyaŋ Al Kurunyen tonenya gabu hen unjkuren hiyyen.

¹⁸ Niŋgeb leplep matabe tubul po ten hinayin. Mata bulun hoyanbe al hoyan bulun yirde hanyen. Munan leplep mata ten hinayinbe dindikenbe uliŋ goyen po bulun yirde hinayin. ¹⁹⁻²⁰ Irde uliŋbe Holi Spirityen ya balem yen nurde hinayin. Holi Spirit Al Kurun belen duntin gobe uliŋ bana hi. Mata bulunŋin gote murun gem dindiken yawartek goyen Doyaŋ Al Kurun belen yawaren yenbe darim wok irde kamyin geb uliŋ gobe dende moŋ. Niŋgeb uliŋ go kenkela doyaŋ yirde hikeb gore meten ten hikeb Al Kurunyen denge kurun hen hiyen.

7

Ire unyat mata kenkela gama irde hinayin

¹ Be, asaŋ kaŋ gusunan niran goyen wol henbe gaha dineŋ tihim. Be, al berem moŋ hinayin gobe igin yen nurde hime. ² Goyenpoga alya bereya budam wor po leplep mata ten hanyen geb, albe berem yan henayin, irde berebe un minyan henayin. ³ Albe berem belen yenya hen hen ge nurkeb go po gama irde hiyen. Gwahade goyen po, bere wor un belen yenya hen hen ge nurkeb go po gama irde hiyen. ⁴ Gobe beremde uliŋ gobe yende kudinŋen po moŋ, gobe

unđe manañ geb, gago dinen hime. Unyen ulin wor yende kudinen po mon. Beremde manañ. ⁵ Ningebe al beben berem bada ma irde hiyen. Bere wor gwahade po un bada ma irde hiyen. Gega Al Kuruñ mere ird ird nin ten tumñande dufay unkuren irde mun kura kutña irye yenbe igin gwaha ten hiriryen. Goyenbe go kamereb sopte gabu ten hiriryen. Gwaha ma ten hiriryenbe bereya ma alya ferd ferd dufaymin epte ma fole irtek hekeb Satan beben wan tunan yuryen geb. ⁶ Ga dinen hime gabe gwaha po ten hinayin yen nurdeya ma dinen hime. Gwaha ten hinayin gab igin yen nurdeya dinen hime. ⁷ Albe ne yara hen berem mon hiwon yen nurde hime. Goyenpoga albe nende gigen Al Kuruñyen taren hoyan hoyan yuntin han. Ningebe al kurabe berem mon gega, goke ma nurde hanen. Munan al kurabe gote taren ma ten sanin hoyan titin geb, bere yade ga hanen.

⁸ Be, al kura bere ma yawartin han goya bertapyabe ne hime gahade dulin hinayinbe igin yen nurde hime. ⁹ Goyenpoga al nin ma bere nin dufaytin harke epte ma hika titek kenem albe bere yade berebe al yade ten hinayin gobe igin yen nurde hime. Mongo dulin henbe albe bereya, berebe alya ferd ferd nin bitin harke kak beben det kunga titin yara epte ma hika titek henayin.

¹⁰ Be, al berem yan, irde bere un minyanbe mere taren po dirde hime gayen nurnayin. Mere gabe nere mon, Doyan Al Kuruñyen mere. Ningebe bere un minyanbe un yilwa ma iryen. ¹¹ Goyenbe bere go un tubul ten kenenbe dulin po hen al

hoyañ ma tiyyeñ. Moñ kenem uñ hitte mulgañ heñ tumñañ hiriryen. Irde al wor berem ma takira tiyyeñ.

¹² Be, deñ hañ bana goñ ire unya kura uñ wet ma berem wet goyen Yesu ma nurd untiñ goke saba direñ tihim. Be, berem gore uñ goya tumñañ hireñ yeñ nurde hike kenem uñ beleñ takira ma tiyyeñ. Mere gabe Doyañ Al Kurunyen moñ, dufayner dineñ hime. ¹³ Irde deñ hañ bana goñ niñ bere wor uñbe Yesu ma nurd untiñ gore berem goya hireñ po yeñ nuryeñbe bere gore uñ yilwa ma iryeñ. ¹⁴ Gobe al kura Yesu ma nurd unen hi goyen berembe Yesu nurd untiñ hi goke teñbe kame Yesu niñ dufaymiñ tareñ irkeb Al Kurun beleñ wukkeñ iryeñ geb, gago dineñ hime. Bere kura Yesu ma nurd untiñ hi wor uñbe Yesu nurd unen hi goke teñbe Yesu niñ dufaymiñ sañiñ irkeb Al Kurun beleñ wukkeñ iryeñ. Gwahade moñ manhan ire unya gote dirneñ weñbe Al Kurun diliñde wukkeñ ma hewoñ. Goyenbe naniñ ma miliñ kura Al Kurun diliñde wukkeñ hitiñ geb, dirneñ weñ wor wukkeñ hitiñ hañ.

¹⁵ Gega Yesu niñ ma nurtiñ kura beleñ uñ wet ma berem wet go tubul tiye yeke goya utañ ma irnayiñ. Yesu niñ ma nurtiñ kura beleñ uñ wet ma berem wet Yesu niñ nurtiñ go takira tike goke kandukneñ ma nuryeñ. Igiñ duliñ hiyeñ. Gega Al Kurun beleñ neñ gayen bininiñ yisikamke igiñ po hinayiñ yeñ hoy diriñ geb, bertiñ wet ma almetiñ wet Yesu niñ ma nurtiñ goya bur ma yeñbe awalikde hiriryen. ¹⁶ Deñ Yesu niñ nurtiñ bere, deñ ge teñ almetiñbe Yesu niñ dufaymiñ

tarej irke Al Kurun belen yawaryen daw yen ma nurde han? Irde den Yesu nin nurtin al, den ge ten bertinbe Yesu nin dufaymin tarej irke Al Kurun belen yawaryen daw yen ma nurde han? Nin geb Yesu nin nurtin kura belen un wet ma berem wet goyen Yesu nin ma nurtin goke ten tubul ma tiyyen.

Al Kurun belen gwahade hinayin yen hoy dirtin gwaha mat po hinayin

¹⁷ Goyenpoga den dun kuren dun kuren goyen gwahade hinayin yen Al Kurun belen hoy dirtin, irde Doyan Al Kurun belen goke momon dirtin gwaha mat po hinayin. Saba gabe Yesuyen alya bereya tumnan gama irde hinayin yen gago saba dirde hime. ¹⁸ Nin geb al kura Al Kurun belen hoy iryin goyenter bikken guba yitin kenem al go guba yen ulin delnen yan hitin go daha mat bikken guba ma yanya hiyen gwahade hewe yen kurut ma yiyyen. Irde al kura Al Kurun belen hoy iryin goyenter guba ma yitin kenem guba yen yen ge kurut ma yiyyen. ¹⁹ Guba yitin ma, guba ma yitin gobe Al Kurun dilindebe det kurun mon. Munan Al Kurunen saba gama ird irdbe det kurun wor po. ²⁰ Nin geb Al Kurun belen han kapa dahade hikeya hoy dirtin gwahade po hinayin. ²¹ Nin geb den han bana gon al kura al hoyan yufukde hen dulin meten ten hikeya Al Kurun belen hoy diryin kenem daha tiye tiye ma tiyyen, gwahade po hiyen. Gega dufayminde hen hen belnen kura kinyen gobe igin gwaha tiyyen. ²² Al kura al hoyan yufukde hen meten al dulnen hikeya Doyan Al Kurun belen hoy irde

tirin al gobe Doyan Al Kurun dilin de meten al dulnen mon yen kinyen. Irde gwahade goyen po, al kura meten al dulnen mon, yingen de dufayde kun hikeya Doyan Al Kurun belen hoy irde tirin al gobe meten alne yen kinyen. ²³ Dende mata bulun gote murungem dindiken yawartek goyen Doyan Al Kurun belen yawaren yenbe darim wok irde kamyin geb, megen nin marte mata bulun gama irde go yufukde ma hinayin. ²⁴ Ningeb, kadne yago, sopte dinen hime. Al Kurun belen den dun kuren dun kuren dahade hikeya hoy dirtin gobe gwahade po hinayin.

²⁵ Be, den han bana gon al kura berem monya bere un min monya nin momon diren tihim. Alya bereya gwahade goyen goke Doyan Al Kurun belen mere ma nirtin geb, dufayner momon diren. Nebe Doyan Al Kurun belen buninen nirde hiyen al ningeb, mere diren tihim gabe fudinde yen nurnayin. ²⁶ Be, ga hite nalu gayenterbe kanduk kurayen kurayen yenen yenen nalure hite. Ningeb hen hentin dahade hanyen gobe gwahade po hinayin. ²⁷ Ningeb al kura berem yan kenem takira tiye tiye ma tiyyen. Munan al kura berem mon kenem bere tewe tewe ma tiyyen. ²⁸ Goyenbe bere tiyyen gobe mata bulun mon. Gwahade goyen po, bere fonen kura al kuyen go wor mata bulun mon. Gega al bere tiyyen irde bere un minyan hiyyenbe megen gar nin kanduk kurayen kurayen yenen hinayin. Den goyen kanduk ma yenen hiwon yen nurdeb gago momon dirde hime.

²⁹ Kadne yago, ga dinen hime gate minbe ga-

hade: megen gar heñ heñninibe ulyande mon geb, al kura berem yan gobe al berem mon belen Al Kurun niñ po nurde hanyen go gwahade goyen ten hiyen. ³⁰ Irde al kura kanduk yenen esen hiyen gega, kanduk go sobamde ma hiyen yen nurdeb goke ugun po ma dufay heñ hiyen. Munan al kura aman hiyyen gega, aman dufay go huginen gwahade po ma hiyen geb, “Gahade po heñ,” yen ma nurde hiyen. Irde al kura det damu tiyyen wor, “Det gabe huginen kerde heñ,” yen ma nurde hiyen. ³¹ Irde det megen niñ han kurun gayen manan gahade po ma hinayin geb, al kura megen niñ det yade meten yunen henyabe det go hende po bin hek ma irde hiyen.

³² Niñgeb daha tiniñ tiniñ ten dufaytin hi-burnen ma hiwon yen nurde hime. Al kura berem mon gobe dufayminde daha mat meten timeke Doyan Al Kurun amanen nurde hiyen yenbe gwaha mat po meten ten hiyen. ³³ Gega al kura berem yanbe daha timeke gab berne amanen nurde hiyen yenbe goke po kurut yen hiyen. Go ten hi gobe megen niñ mata niñ ug po dufay heñ heñ mata go goyen. ³⁴ Gwaha tikeb Doyan Al Kurun belen amanen nurtek belen niñ dufay heñ heñminbe kenkela kipirtin ma hi. Be, bere kura un minmonya bere fonenyabe Doyan Al Kurun niñ po nurde ulinya dufayminya tunnan Doyan Al Kurun po unen hanyen. Munan bere kura un minyanbe daha timeke gab almene amanen nurde hiyen yenbe goke po kurut yen hiyen. Go ten hi gobe megen niñ mata niñ ug po dufay heñ heñ mata go goyen. ³⁵ Mere ga dirde

hime gabe faran durmeke hen hentin igin hewon yen dinen hime. Kanduk dunhem yen ma dinen hime. Mere gahade ga dirmeke gab matatinbe Doyan Al Kurun dilinde huwak wor po hiyyen, irde yen ge ten meten ten ten nin kama ma hen sanin po meten ten hiwon yen nurdeb gago dinen hime.

³⁶ Goyenpoga al fonen kura bere tubul ten untek yen merem titin goreb merene gayen nurdeb, “Polyen mere gobe fudinde. Goyenpoga meremin gama irde bere ga tewen monbe dufaymin bulun iren geb tewen,” yen nuryenbe bere go tiyyen.* Mata gobe bulun mon. Irde hiyen kurun gobe bere go tubul titek ma irde hike kenem bere go tiyyen. Mata gobe bulun mon geb, gwaha tiyyen.

³⁷ Gega al kura bikken bere tubul ten untek yen merem titin gega, al gore, “Igin nunkuren hen,” yen dufay tarej po irdeb, “Bereya hen hen dufay ma forok yen hi, irde dufay gwahade kura forok yeke igin fole irde hen,” yen nurdeb bere ma tewen yen dufay kiryen goyen wor mata igin yen nurde hime. ³⁸ Ningeb al bere yad yad matabe igin. Gega al kura berem mon hiyyen mata gobe igin wor po, bere yad yad mata gote folek.

³⁹ Be, bere kura un minyanbe un go hikeyabe yen yufukde po hiyen. Gega un go kamkeb bere un yanbe al hoyan ma tiyyen yitin mere gote yufuk bana ma hiyen geb, al hoyan tewe yenbe

* **7:36:** Grik mere mat min kurabe gahade: Goyenpoga al kura beley wirin al kutek nurke beleymin pet ten hike kun kun alik hewen tike kenenbe bulun irde hime yen nurdeb al kere yen nuryenbe gwaha po iryen. Mata gobe bulun mon.

igin tiyyen. Goyenpoga Doyan Al Kurun nurd untin al po ga tiyyen. ⁴⁰ Goyenbe dufaynerbe bere go un kamke unkuren hen hen gobe igin wor po. Gogab un nin nurde hiyen gwahade ma ten Doyan Al Kurun nin po nurde hiyen. Mere dirde hime gabe Holi Spirit belen ninen hike dinen hime yen nurde hime.

8

Det tonen yirde binje galak yirtin binjebe daha yirtek?

¹ Be, megen nin mar belen det tonen yirde dolon yirde binje galak yirtin goke momon diren tihim. Denbe dindiken ge yenbe, “Nenbe det kawan ninya banare ninya goyen kenkela bebak ten hite,” yen nurde han. Goyenbe gwahade nurde han goke tenbe dindiken ge turun turun tenbe kadtin yago bulun yirde han. Gega kadtin yagon amanen nurd yunen hinayinbe kadam faran gurd tenbe tumnan sanin henayin. ² Al kura yingen ge yenbe, “Nebe det kawan ninya banare ninya goyen kenkela wor po bebak ten hime,” yen nurde hi al gobe yingen goyen po usi irde hi. Irdeb Al Kurunyen mere fudinde yingen nurde bebak titek goyen bebak ma titin hi. ³ Goyenpoga al kura binde mat Al Kurun nin amanen nurde unen hi al gobe Al Kurunyen dufay igin kurun goyen untin hi.

⁴ Ningeb det tonen dolon yirnin yen galak yirtin binje goke momon diren tihim. Be, det tonen megen nin mar belen dolon yirde hanyen gobe Al

Kurun mon geb, det fudinde gogo mon. Al Kurunbe yeñ unkuřen po, hoyañ kura ma hi. Hubu wor po. ⁵ Gega megen niñ marbe dufaymiñ soñ hekeb unğura kurayen kurayen gobe Al Kurun yeñ nurdeb, “Al Kurunbe budam hañ. Doyañ Mar wor budam hañ. Kurabe nañkinde hañ, kurabe megen hañ,” yeñ hanñen. ⁶ Goyenpoga Al Kurunbe unkuřen po, neñ nurd unen hite gog po hi. Yeñbe Adoniniñ. Yeñ beleş po gab nañkinya megenya irde det kurun gayen yiryiñ. Irde neñbe yeñ ge teñ megen gar hite. Irde Doyañ Al Kurun wor unkuřen po hi. Yeñbe Yesu Kristu. Yesu Kristube Al Kurun beleş inke nañkinya megenya det kurun gayen yiryiñ. Neñ wor yeñ beleş forok diryiñ.

⁷ Goyenbe mere fudinde gayen al budambe kenkela bebak ma teñ hañ. Niñgeb deñ hañ bana goñ al kurabe hakot Yesu niñ ma nurde hinjanya unğura doloñ ird ird mata teñ hinhan geb, gayenter Yesu nurd unen henya wor unğura galak yirtin goyen nenebe, “Neñbe unğura galak yirtin biñge goyen gago nene hite,” yeñ nurde biñde kandukneñ nurde hanñen. Mel gobe biñde wukkek wor po mon geb, “Biñge ga nihit garebe Al Kurun diliñde wukkek ma hihit,” yeñ nurde hañ. ⁸ Gega biñge nen nen mata gore kura neñ gayen Al Kurunya awalik heñ heñniñ goyen daha kura ma iryeñ. Niñgeb unğura galak yirtin biñge netek ma go ma netek gore kura Al Kurun diliñde daha wet kura ma diryeñ.

⁹ Goyenpoga mongo mata kura Al Kurun diliñde bulun mon goyen hipirkeñ nurdeya mata

teñ hinayin gore kadtin kura Al Kurunyen mere binde taren wor po ma hitin al gote dufaymin goyen bulun irke katyenkek geb, kenkela dufay hen ga mata ten hinayin. ¹⁰ Den Al Kurunyen mere kenkela bebak titin marbe igin kun unğura dolon ird ird gasunde hen dula ten kun hinayin. Gega den belen gwaha ten hike den han bana gon nin kadtin kura bin wukkek wor po mon gore denenbe, “Nen wor igin daw gwaha titek,” usi tenbe binde go nene gab mata bulun tihit yen kanduknen nurdeb katnayin. ¹¹ Irkeb denbe kadtinde dufaymin taren wor po mon goyen bulun ird ird mar henayin. Yen ge ten Yesu Kristu kamyin gega, den belen bulun yirnayin. ¹² Den belen gwaha mat kadtin goyen bulun yirde mata bulun ten hinayin, irde bin wukkek wor po mon goyen haga irde hinayin gobe yen hitte po mon, Yesu Kristu hitte wor mata bulun ten hinayin. ¹³ Ningeb nebe dapna kura nemeke gore kadne dufaymin bulun irke mata bulunde katyen kenem dapna go sopte ma po newen. Gogab kadne go mata bulunde ma katyen.

9

Ne Pol wor Yesuyen mere basan al aposel

¹ Be, den belen ne nin yen, “Dufayminde epte ma det kura iryen,” yen nurd nunen han? Irde ne gayen Yesuyen mere basan al aposel mon yen han? Irde Doyan Al Kuruninin Yesu Kristube ma kinyin yen nurde han? Goyenpoga Doyan Al Kurunyen saninde meten timirin gote iginenbe den gogo mon? Goyenbe danin gwaha yen han?

² Be, den hañ bana goyen al kura belen, “Polbe aposel moñ,” yeñ hañ. Irde al hoyañ belenbe, “Polbe neñ ge ma aposel hiriñ,” yeñ hañ. Nebe meremiñ goke ma nuren gega, den ge ten aposel himiriñ geb, denbe epte ma gwaha ninnayiñ. Al hoyañ belen den denenbe, “Fudinde, Polbe Doyañ Al Kurun belen aposel iriñ,” yeñ nurd nunen hinayiñ.

³ Be, den hañ bana goyen al kura belen gwaha mat tagal nunen hañ geb, goyen wol heñ momoñ direñ tihim geb. ⁴ Be, neñ aposel belen meten ten hiteke goke Yesuyen alya bereya belen biñgeya feya dunke netek gobe buluñ? ⁵ Yesuyen mere basañ mar hoyanya Doyañ Al Kurun Yesu kuliñ wenyabe Pitaya* wor berem yagoya irde tumñañ meten ten kuñ hanyen. Munañ nenbe berniniñ yago dufaymiñ Yesu niñ taren irtiñ goya meten ten kuñ hitekbe buluñ yeñ nurde hañ? ⁶ Irde aposel hoyañ po paka yirde hanyen gega, Ban-abasya neya niñ yenbe, “Yingen ga tarenminde biñge neneb meten ten hiriryen,” yeñ nurde hañ?

⁷ Be, fulenja mar fulenare kuñ henyabe ganuñ kura yingen de horare biñge damu ten nene hanyen? Irde al ganuñ kura wain harke iginen hekeb kura ma nen hiyen? Irde al ganuñ kura sip-sipmiñ doyañ yirde hiyen gega, sipsip gote mamu kura ma gilyañ heñ nene hiyen? Epte ma gwaha tiyyen. ⁸ Mere ten hime gabe alyen dufayde po ma mere ten hime. Moseyen sabare wor mere gwahade po hi. ⁹ Be, Moseyen sabarebe, “Al kura wit metenmiñ sak yeke meten de niñ dapña bul-

* **9:5:** Denjem hoyanbe Sifas.

makawminj gore, 'Farañ nuri,' yen metenjinde tukunya ga, 'Witne niyyenkek,' yen mohonj mala ma tiyyen," yitiñ hi.

Mere gobe Al Kurunj belen bulmakaw ninj po nurdeb gogo yirin? ¹⁰ Mere gwahade tiyyin gobe fudinde wor po neñ gake nurdeb mere gogo tiyyin yen ma nurde hanj? Mere gobe neñ gake yirin. Megeñ waru uryen al goya wit sikkenj kok yiryen al goya tumñande metenj tiyiryen gote murunjem kura munj yawaryen yen nurdeya metenj tiyiryen geb, Al Kurunyen mere gobe neñ al gake yirin. ¹¹ Niñgeb neñ belen Holi Spirityen det iginj goyen bitinj bana tur yirtirin geb, metenjinin gote murunjem binje ninj gusunanj dirtek gobe kanduk kurunj wor po yen nurnayin? ¹² Al hoyan belen denj ge tenj metenj dirnenj munj po titinj goke farañ durnanj yen iginj gusunanj dirtek kenem neñ mananj denj ge tenj metenj kurunj wor po titinj goyen gote murunjem ninj iginj gusunanj dirtek.

Goyenbe neñbe farañ durnanj yen gusunanj ma dirde hinhet. Gwaha titnenbe monjo farañ durd durd gore Yesu Kristu ninj yitiñ mere iginj go denj bana kurunj henj henj belen pet tiyyen yen nurdeb det kuranj nurde hinhet gega, gusunanj ma dirde goke ma nurdeya metenj tenj hinhet. ¹³ Be, denjbe Al Kurunyen ya balem bana metenj tenj hanjen marbe bana gonj ninj binje yade nene hanjen, irde Al Kurunj galak ird ird altare metenj tenj hanj marbe alta hende yirtinj binje goyen kura yade nene hanjen goyen go ma nurde hanj? ¹⁴ Gwahade goyen po, Doyan Al Kurunj ninj yitiñ mere iginj goke tagalde hanj marbe mere go nurde

gama irde han mar belen faran jurke go hende hen meten ten hinayin yen Doyan Al Kurun belen mere sanin po tiyyin.

¹⁵ Nebe Doyan Al Kurun belen yirin gwahade po igin faran nurnan dinmewon gega, gwaha ma dinen himyen. Irde mere gahade kan dunen hime gabe den belen gwaha mat paka nirde hinayin yen ma kan hime. Nebe den ge ten Doyan Al Kurunyen meten ten henya gote murungem nin gusunan ma dirde hinhem geb, goke igin nigen ge turun turun titek hime. Nin geb faran nurd nurd nin al kura ma po gusunan iren. Kamde ga daw gwaha tiyen. ¹⁶ Be, Yesu nin yitin mere igin go tagalde kun henyabe nigen ge turun turun ten hitek himyen dinhem gega, epte ma nigen ge turun turun titek himyen. Mere igin tagal tagal gobe Al Kurun belen nunyin geb bada hetek mon. Nin geb meten ten himyen goke nigen ge epte ma turun turun titek himyen. Munan mere igin go bada hen tagalde ma himyen manhan Al Kurunyen bearar bana himewon! ¹⁷ Mere igin goyen tagal tagal nin wilaknen nurde tagalenbe gote murungem tewen. Gega meten ten hen gote murungem ma tewen wor Al Kurun belen gwaha ten hayin nintin geb, gago meten go ten hime. Meten gobe gwaha tiyayin nintin geb, bada hetek mon. ¹⁸ Be, gwahade kenem meten ten hime gote murungembe da tewen? Meten ten hime gote murungembe hoyan mon. Ne belen meten gote murungem tetek gobe Yesu nin yitin mere igin goyen damum mon dulin po alya bereya hitte tagalde himyen gogo po. Fudinde, nebe mere igin go tagalde hime goke ten paka nirnan yinen hitek

gega, gwaha ma yinen himyen.

¹⁹ Be, nebe dufayner igin nurdeb gwaha ten himyen. Megen nin al kurate dufayde ma ten himyen. Gega daha mat kura al tumnan Yesu hitte yukumewon yen nurdeb nigen al buda kurun gote yufukde hen meten ten himyen. ²⁰ Gwahade ningeb, Yuda marya henbe go mar go Yesu hitte yuken yenbe yende mata gama ird ird al yara hen himyen. Yuda mar gobe Moseyen saba gote yufukde hen go po gama irde hanjen. Munan nigenbe go yufukde ma hime geb, gore epte ma daha wet kura niryen gega, go mar go Yesu hitte yuken yen nurdeb Moseyen saba gote yufukde hime yara ten himyen. ²¹ Munan Yuda mar mon al min hoyan Moseyen saba ma gama irde han mar go wor Yesu Kristu hitte yuken yenbe Moseyen saba ma gama irde hitin al yara hen himyen. Nigenbe Moseyen saba gote yufukde ma hime. Goyenbe Al Kurunyen saba pel irde hime yen ma yen hime. Gwahade yarabe Yesu Kristuyen saba gote yufukde po hime. ²² Irde Yesuyen alya bereya kura Al Kurunyen mere hende taren wor po ma huwarde hitin mar go Yesu hitte yuken yenbe go mar goyen yara po hen himyen. Ningeb al dahade mar hitte kun meten ten kun henyabe go mar goyen yara po hen meten ten himyen. Gogab daha mat wet kura go mar goyen kura Yesu hitte yukumewon yen gogo gwaha ten himyen. ²³ Gwaha ten himyen kurun gobe Yesu nin yitin mere igin goke al momon yire yenbe gwaha ten himyen. Gwaha ten himeke gab al belen mere igin go nurdeb yen wor nen

yara hekeb tumṇaṇ Al Kurunṇ beleṇ guram yirtek hewoṇ yeṇbe gogo gwaha teṇ himyen.

²⁴ Be, kup yeṇ yeṇ kari gote matabe nurde haṇ gogo. Al budam miṇ urde kup yenayiṇ gega, al unṅureṇ beleṇ po kadom fole yirde kuṇ pasi iryeṇ al gore muṇ po gab gote muruṅgem tiyyeṇ. Niṅgeb deṇ wor Doyaṇ Al Kurunṇyen meteṇ teṇ heṇyabe meteṇ gote muruṅgem goyen tetewoṇ wor po yeṇ nurdeb tareṇ po meteṇ teṇ hinayiṇ. ²⁵ Kup yeṇ yeṇ karire kup yeṇ haṇ mar ma, kari hoyande kari teṇ haṇ marbe karire kuṇ gote muruṅgem tiniṇ wor po yeṇ nurdeb yiṅgeṇ saṇiṇ yird yird niṇ uliṇ kutṇa irde hanṇen. Mel gobe kari gote muruṅgem ulyande ma hitek goke wor gogo kurut wor po yeṇ haṇ. Goyenpoga neṇ beleṇ tareṇ heṇ heṇ niṇ kurut yeṇ hityen gobe Doyaṇ Al Kurunṇyen meteṇ gote muruṅgem hugiṇeṇ hitek go tiniṇ yeṇbe tareṇ heṇ heṇ niṇ kurut yeṇ hityen. ²⁶ Niṅgeb mel gore kup yeṇ hanṇen gobe Al Kurunṇ diliṇde miṇ miṇmoṇ gega, ne beleṇ al kup yeṇ haṇ gwahade saṇiṇ po meteṇ teṇ himyen gobe Al Kurunṇ diliṇde miṇ miṇyaṇ. Fuleṇa teṇ teṇ karire kari teṇ hanṇen marbe asogom keṅkela yeneṇya gasa yirde hanṇen gwahade goyen po, ne wor meteṇ gote miṇ keṅkela nurdeya meteṇ teṇ himyen, mali ma meteṇ teṇ himyen. ²⁷ Gwaha titṇeṇbe meteṇ goyen keṅkela po timewoṇ yeṇ nurdeb megen niṇ dufay buluṇ kura bener forok yeke gore buluṇ nirnak yeṇbe fole irde himyen. Moṅgo Yesu niṇ al hoyanṇ momoṇ yirdeb gote muruṅgem tetekner, dufay buluṇ gore walde nunnak yeṇbe gogo dufay buluṇ goyen fole irde

himyen.

10

Ungura doloŋ ird ird niŋ hayhay yiryiŋ

¹ Be, kadne yago, deŋ goyen tareŋ heŋ heŋ ge kurut yeŋ hinayiŋ dinhem goke keŋkela bebak tinaŋ yeŋbe neŋ Yuda marte asininiŋ yago beleŋ mata tiyamiŋ goke momoŋ direŋ tihim. Niŋgeb mel gore mata tiyamiŋ go nurdeb gote saba bitiŋ sir ma yiyyeŋ. Be, bikkeŋ wor po asininiŋ yagobe Isip naŋa tubul teŋ kuniŋ yeŋ kuŋ heŋyabe tumŋaŋ kigariŋkiŋ faykek yokŋa bana heŋ kuŋ hinhan. Irdeb makaŋ ala kuruŋ goyen kahalte Al Kuruŋ beleŋ pota irke megeŋ fudiŋ forok yekeb goyaŋ mat kuŋ siŋa kurhan forok yamiŋ. ² Mel go tumŋaŋ kigariŋkiŋ faykek yokŋa bana heŋ kuŋ hinhan, irde makaŋ alayaŋ kwamiŋ gobe Al Kuruŋ beleŋ baptais yiryiŋ yarabe gogo. Be, Al Kuruŋ beleŋ gwaha yirdeb mel goyen Moseyen alya bereya yirkeb doyaŋ yirde hinhin. ³ Be, goyenter Al Kuruŋ beleŋ biŋge yuneŋ hinhin gobe megen niŋ biŋge moŋ. ⁴ Irde fe niŋ yirke Al Kuruŋ beleŋ hora kurunde mat fe forok irde yunke nene hinhan. Hora kuruŋ gobe Al Kuruŋ hitte mat kateŋbe Israel mar goya tumŋaŋ kuŋ hinhin. Hora gobe Yesu Kristu gote tuŋaŋeŋ. ⁵ Al Kuruŋbe mel go igiŋ igiŋ gwahade yirde hinhin gega, al budam wor po mata buluŋ teŋ hike igiŋ ma nurde yuneŋ hinhin. Niŋgeb mata buluŋ teŋ hinhan mar go sawsawa po kuruŋ naŋa bana goŋ kuŋ heŋya kamamiŋ.

⁶ Be, mata bulunmin gote murungem ten kamamin gobe nen gayen baranmin goyen nurdeb kafura hen mel gore ten hinhan gwahade ma tenbe dufayninin mata bulun ten ten nin ma kun hiyen yen gogo Al Kurun belen dikala diryin. ⁷ Ningeb denbe mel goyen kuramin belen megen nin det tonej yirde doloj yirde hinhan gwaha ma ten hinayin. Mel gore mata bulun ten hinhan goke Al Kurunyen asande gahade katin: “Mel gobe det tonej dilin mar keperde dula ten kukuwa fe nen nen mata ten hinhan. Irde huwardebe Al Kurun nin ma nurd untin marte mata ten hinhan,” yitin hi. ⁸ Be, mel goyen kuraminbe lelep mata tenbe nan kahal un kurende po 23,000 alya bereya goyen kamamin. Ningeb nenbe go mar gore tiyamin gwahade ma ten hitek. ⁹ Be, Israel mar goyen kurabe Doyan Al Kurun tunan urde beararmin bana hen kunere duwi belen yisike kamamin. Ningeb nenbe mel gore tiyamin gwahade Doyan Al Kurun tunan ma urtek. ¹⁰ Irde hen hentin goke Doyan Al Kurun nin ingin ma nurde ngak ma yen hinayin. Hakot Israel mar kura gwaha tikeb Al Kurunyen miyon, al gasa yird yird meten ten hiyen gore gasa yirke kamamin.

¹¹ Be, hakot Israel mar hitte mata gwahade forok yitin gobe gayenter nen belen baran go nurdeb bebak ten ten ge gogo forok yitin. Irde baran go asande katin gobe nalu funan belen hite mar gayen baran go kapyan henbe mata bulun ma ten hinayin yen hayhay dird dird nin Al Kurunyen asande katin. ¹² Ningeb den han bana

al kura belen, “Nebe taren hime geb, kanduk kura wayyen goyen epte fole irde hen,” yen hi al gobe kenkela hen ga hiyen. Monjo katyen geb. ¹³ Alya bereya mata bulunde yukutek kanduk den hitte forok yen hanjen gobe al hoyan hitte wor forok yen hanjen goyen po forok yen dunen hanjen. Goyenpoga Al Kurunbe yirin gwahade po mata ten hiyen geb, den belen epte ma fole irtek kandukbe epte ma den hitte yubul tike forok yen hinayin. Munan kanduk kura den hitte forok yekeb kanduk go fole yirtek belnen manan kerd dunen. Gogab den goyen kanduk bana gon hinayin gega, kanduk goyen ingin fole yirde sanin po huwarde hinayin.

Epte ma tumnan de Al Kurunya unjuraya gama yirtek

¹⁴ Be, kadne yago, megen nin det yade det tonen yirde dolon ird ird mata gob tubul po tinayin. ¹⁵ Den goyen dufaytin wukkeken yen nurdeb gago mere dirde hime. Nin geb dindiken gabe mere diren tihim gayen ingin ma bulun goyen kenen bebak tinayin. ¹⁶ Be, nenbe Yesu Kristu belen nen ge ten darim wok irde kamiyin goke dufay hen hen nin gabu irde wain fimin tenbe Al Kurun ingin nurde unenbe nene hityen. Gwaha ten hite gobe Yesu Kristu kamkeya darim wok yitin goyen nen tumnan gale hen nene hite yara geb, gore dawan gabu dirkeb al min unkenen hen hityen gogo. Irde nen ge ten Yesu Kristu kamiyin goke dufay hen beret ubala ten gale hen nene hityen gobe Yesu Kristu kamkeya gason erek yitin goyen nen tumnan gale hen nene hite yara geb, gore

dawaŋ gabu dirkeb al miŋ uŋkurenj heŋ hityen gogo. ¹⁷ Niŋgeb neŋbe al miŋ hoyanj hoyanj gega, beretbe hoyanj hoyanj moŋ, uŋkurenj po nene hityen geb, Yesuya awalik heŋbe al miŋ uŋkurenj po hitiŋ hite.

¹⁸ Be, Israel mar bikkenj mata teŋ hinhan goyen goke nurnayiŋ. Dapŋa gasa yirde Al Kurunj niŋ galak irtiŋ goyen nene hinhan marbe Al Kurunya gabu irde uŋkurenj hitiŋ hinhan. ¹⁹ Niŋgeb biŋge det toneŋ yirtiŋ goyen galak yirtiŋ gobe det kurunj geb gogo dinenj hi yeŋ nurde haŋ? Irde al beleŋ det toneŋ yirtiŋ goyen doloŋ yirde haŋyen gobe det kurunj wor pobe gogo yeŋ nurde haŋ? ²⁰ Moŋ! Al Kurunj niŋ ma nurde haŋ mar beleŋ megen niŋ det toneŋ yirde galak yirde haŋyen biŋge gobe uŋgura galak yirde haŋyen, Al Kurunj ma galak irde haŋyen. Niŋgeb deŋbe uŋguraya awalikde ma hiwoŋ yeŋ nurde hime. ²¹ Deŋbe Doyan Al Kurunj kamyiŋ goke dufay heŋ heŋ ge wain fimiŋ nene haŋyen. Niŋgeb deŋ go mar gore po uŋgura niŋ nurde doloŋ yird yird gasuŋde kuŋ gor niŋ wain ma nenayiŋ. Deŋbe Doyan Al Kurunj kamyiŋ goke dufay heŋ heŋ ge biŋge nene haŋyen. Niŋgeb deŋ go mar gore po kuŋ uŋgura doloŋ yird yird gasuŋde niŋ biŋge goyen ma nenayiŋ. ²² Neŋbe Doyan Al Kurunj beleŋ biŋ ar wor po yiwi yeŋ kuŋ uŋgura galak yirtiŋ biŋge netek? Nende tareŋbe Doyan Al Kurunyen tareŋ folek geb, epte ma buluŋ diryen yeŋ nurde gwaha teŋ hitek? Epte moŋ.

Al Kurunj turuŋ irde hitek

²³ Be, deŋ haŋ bana al kura belen, “Neŋbe mata kura tiniŋ yeŋbe igiŋ ala titek,” yeŋ haŋyen. Gega mata go tinayiŋ gore hugiŋeŋ igiŋ dirnayiŋ yeŋ ma nurde hinayiŋ. Niŋgeb nebe mata kura tiye yeŋbe igiŋ ala tiyeŋ gega, mata gore epte ma nanarde boŋ yiyyeŋ. ²⁴ Gwahade niŋgeb det kura dindikeŋ igiŋ dird dird goke ma naŋkeneŋ hinayiŋ. Gwaha titŋeŋbe det kura kadtiŋ igiŋ yirtek goke naŋkeneŋ hinayiŋ.

²⁵ Niŋgeb maketde kuŋ igiŋ dapŋa damu teŋ nene hinayiŋ. Goyenbe mata buluŋ tihit yeŋ nurtek dufay ma forok yeŋ yeŋ ge teŋbe, “Biŋge gabe uŋgura galak yirtiŋ we?” yeŋ gusuŋaŋ ma yirde mali po damu teŋ nene hinayiŋ. ²⁶ Megenya det kuruŋ megen haŋ tumŋaŋ goyenbe Doyaŋ Al Kuruŋyen ala po geb, gogo igiŋ ala nene hinayiŋ. ²⁷ Niŋgeb al kura Yesu niŋ ma nurtiŋ gore dula teŋ teŋ niŋ hoy dirke kuniŋ yeŋ nurdeb kuŋ yeŋya biŋge nenayiŋ. Gega mata buluŋ tihit yeŋ bitiŋde kandukŋeŋ nurtek dufay ma forok yeŋ yeŋ ge teŋbe, “Biŋge gabe uŋgura galak yirtiŋ?” yeŋ gusuŋaŋ ma yirnayiŋ. ²⁸ Munaŋ al kura belen, “Biŋge gabe uŋgura galak irtiŋ,” dinkeb ma nenayiŋ. Gogab al kura gwaha dinyeŋ al gote dufay buluŋ ma irnayiŋ, irde mata buluŋ tihit dufay wor forok ma yiyyeŋ. ²⁹ Mata buluŋ tihit dufay biŋde mat forok yeŋ yeŋ ge yeŋ hime gobe dende niŋ ma yeŋ hime, al hoyande niŋ goke yeŋ hime.

Be, goyenbe al kurabe gaha yeŋ haŋyen: “Neŋbe bininiŋde mat wukkeŋ wor po nurdeya mata kura igiŋ ala titek. Gega daniŋ al hoyan

belen denenbe mata bulun tahan yen dennak yen kama henbe gwaha ma tiniŋ? ³⁰ Nenbe binje kura goke Al Kurun igin nurde unen gab nene hitek gega, daniŋ al hoyan belen binje netek goke ulniniŋde merem yan dirnayan? Goke igin ma nurde hite,” yen hanjen.

³¹ Niŋgeb mere gwahade gokeb gaha dinen: binje ma fe yara kura ninin yenbe Al Kurun denem turnun yan hiyyen mat nene hinayan. Niŋgeb mata kura tiniŋ yen nurde hinayan goyenter wor Al Kurun denem turnun yan hiyyen mat po mata ten hinayan. ³² Mata ten hike Yuda mar al kura ma Grik mar al kura ma Yesuyen alya bereya bana go nin al kura belen denenbe dufaymin bulun heke mata bulun tinak geb, matabe nurdeya ga ten hinayan. ³³ Ne wor meten ten kun himyen kurun gobe al tumnan matane kenen amanen nurnayan mat mata ten himyen. Gwaha ten himyen gobe nigen igin hen hen nin ma gwaha ten himyen. Al hoyan budam igin hen hen nin gwaha ten himyen. Gogab yen goyen Al Kurun belen yumulgan tiyyen yenbe gwaha ten himyen.

11

¹ Niŋgeb ne belen Yesu Kristuyen mata po gama irde himyen gwahade goyen po, den wor ne mata ten himyen gayen gama irde hinayan.

Bere tonan aw yurd yurd mata

² Be, denbe hanjen kurun goyen huginen ne nin bitin sir ma yen hi. Irde nen Yesuyen alya bereya belen ten hityen mata goyen momon dirmirin

goyen gama po irde hanj. Niŋgeb goke turuŋ dirde hime.

³ Goyenbe saba kura deŋ beleŋ keŋkela nurwoŋ yeŋ nurde hime. Saba gobe gahade: al tumŋaŋ gote doyaŋ albe Yesu Kristu, irde berer doyaŋ marbe uŋ yago. Yesu Kristuyen doyaŋ albe Al Kuruŋ. ⁴ Niŋgeb deŋ hanj bana goyen al kura beleŋ Yesuyen alya bereya gabu irde hinayiŋde gor heŋ bere beleŋ teŋ hanjen yara amil teŋ tonan aw urde Al Kuruŋ mere iryeŋ irde kurabe Al Kuruŋyen mere basaŋ al porofet yara mere tiyyeŋbe al goreb Doyaŋ Almiŋ Yesu Kristu deŋem buluŋ iryeŋ. ⁵ Irde deŋ hanj bana goyen bere kura beleŋ Yesuyen alya bereya gabu irde hinayiŋde gor al beleŋ mata teŋ hanjen yara amil teŋ tonan aw ma urde Al Kuruŋ mere iryeŋ irde kurabe porofet yara mere tiyyeŋbe bere goreb doyaŋ almiŋ uŋ goyen deŋem buluŋ iryeŋ. Bere go tonan aw ma uryeŋ gobe tonan walde kara tiyyeŋ go gwahade yara geb, memyak wor po. ⁶ Niŋgeb bere kura Al Kuruŋ dolon irniŋ yeŋ gabu irnayiŋde tonan aw ma urde kuyeŋ gobe bere gote tonan yuwalheŋ walde kara tiyyeŋ. Munan tonan gwaha iryeŋ gobe memyak yeŋ nurdeb bere gobe tonan aw urde kuyeŋ. ⁷ Goyenbe albe Al Kuruŋ beleŋ yiŋgeŋ yara iryiŋ, irde saŋiŋmiŋ turuŋ yaŋ goyen al hitte mat kawan heŋ hi, irde bere hitte matbe alyen tareŋmiŋ turuŋ yaŋ goyen kawan heŋ hi geb albe tonan ma aw uryeŋ. ⁸ Fudinde, haŋkapy a wor po albe bere hitte mat ma forok yiriŋ, berebe al hitte mat forok yiriŋ. ⁹ Albe Al Kuruŋ beleŋ bere niŋ teŋ ma iryiŋ. Al niŋ teŋ bere gogo iryiŋ.

¹⁰ Niŋgeb berebe amil beleŋ tonan aw urtiŋde hiyeŋ. Gwaha teŋ hiyeŋbe bere go al kurat yufukde hi yeŋ kennayiŋ. Al Kurunyen miyoŋ wor gwahade kennayiŋ. ¹¹ Goyenpoga mere dirhem gabe berebe det dirneŋ, munan albe det kurun yeŋ ma dinhem. Neŋ Doyan Al Kurun nurd untiŋ mar bana alya bereyabe tunande po. Niŋgeb berebe al ma hike yeŋ unkuŋeŋ po epte ma hiyeŋ, al wor bere ma hike yeŋ unkuŋeŋ po epte ma hiyeŋ. ¹² Berebe al hitte mat forok iryiŋ gwahade goyen po, al wor bere hitte mat forok yeŋ hanyeŋ. Gega alya bereya tumnan gobe Al Kurun beleŋ po yiryiŋ.

¹³ Niŋgeb Al Kurun doloŋ irniŋ yeŋ gabu irde hinayiŋde gor bere kura tonan aw ma urdeya Al Kurun mere iryeŋ gobe igiŋ ma bulun goyen dindikeŋ gab keŋkela dufay heŋbe yenayiŋ. ¹⁴ Det Al Kurun beleŋ yiryiŋ kurun gayen gate matare wor al kura tonan yuwalneŋ sobam heŋ bereyen tonan yara hiyyeŋbe gobe igiŋ moŋ, memyak yeŋ nurde hite. ¹⁵ Gega bere tonan yuwalneŋ sobam hiyyeŋbe igiŋ hoyan yeŋ nurde hite. Tonan yuwalneŋ sobam gobe bere gote tonan aw yurd yurd niŋ Al Kurun beleŋ iryiŋ. ¹⁶ Al ma bere kura mere tihim gake igiŋ ma nurdeb neya kadom mohonde titek wet yeŋ nurnayiŋ. Goyenpoga neŋ banabe mata gwahade gobe hubu wor po. Yesuyen alya bereya Al Kurunyen dirneŋ weŋbe mata gwahade goyen ma teŋ hanyeŋ.

*Yesu kamyiŋ goke dufay heŋ heŋ niŋ dula teŋ teŋ
mata keŋkela teŋ hinayiŋ*

¹⁷ Be, denbe Yesu kamyin goke dufay hen hen nin gabu irde dula ten hanyende gorbe dindiken bulun hetek mata ten hanyen. Munan igin hen hen matabe kura ma ten hanyen, hubu wor po. Nin geb goke turun ma dirde hime, irde gago saba diren tihim. ¹⁸ Mehen de mere diren tihim be gahade: denbe Yesuyen alya bereya gega, gabu irde hanyen bana gon be mata kura kukuwam mat tike gore bipti forok irde hi yeke nurde himyen. Mere gobe tumnan usi yen ma nurde hime. ¹⁹ Fudinde, ganun be Al Kurun dilinde huwak hi, irde ganun be gwahade mon goyen kawan hen hen ge ten den han bana gon dufaytin mun kura hoyan hoyan hinayin goyen epte ma ten sin irtek yen nurde hime. ²⁰⁻²¹ Goyenpoga den bana gon bipti forok yitin goke dinen hime gabe den gabu irde Doyan Al Kurun kamyin goke dufay hen hen ge bin ge nene han goyenter kadin ge ma doyan hen be dindiken ge po nurde dula ten han geb, gago dinen hime. Gwaha ten hikeb kurabe bin ge kamde hikeb kurabe wain kurun nene kukuwa hen han. Nin geb den be, “Doyan Al Kurun kamyin goke dufay hen hen ge bin ge nene hite,” yen nurdeya bin ge nene han gega, gwahade mon yen nurd dunen hime. ²² Goyen be den goyen bin ge ya feya nen nen yatin min mon geb, gogo gabure gor po wan gab gwaha ten hanyen? Gwahade mon kenem Al Kurunen dirnen wen Yesuyen alya bereyabe det dirnen yen nurde mali mali yirde han? Irde bana gon nin alya bereya kura horam mon mar goyen gwaha yirteke yingen buninen yirde memya hena mat mata ten han? Nin geb

matatin goke daha dinen? Matatin goke turun diren? Epte mon!

²³ Be, hakot dula mata goke Doyan Al Kurun belen ninke ne wor momon dirmirin. Mere gobe gahade: Doyan Al Kurun Yesu goyen Yudas belen asogom haninde keren tiyyin wawun goya goyenbe Yesu belen beret kura tirin. ²⁴ Irdeb beret goke Al Kurun turun irde ubala tenbe, “Beret dunhem gahade gayen po, nebe den ge ten kame. Ningeb goke tenbe beret gabe gasonne geb, beret ga ten nenan. Irde kame den wor ne nin bitin bak yen yen ge ten mata gahade ga po ten hinayin,” yirin. ²⁵ Irde beret go neneb wain fimin tenbe beret ten yirin gwahade po, “Al Kurun belen mata buluntin halde halde nin ten binja gergen tiyyin goke darine wok yiyyen. Ningeb goyen goke wain gago dunhem geb, ten nenan. Irde kame den wor ne nin bitin bak yen yen ge ten mata gahade ga po ten hinayin,” yirin. ²⁶ Ningeb gabu irde dula gwahade ten wain nen nen mata tinin yenbe gwaha mat Doyan Al Kurun belen alya bereyat mata bulunmin ge ten kamyin goke al hoyan momon yirde hinayin. Gwaha tike kun kunbe kame Doyan Al Kurun wayyen.

²⁷ Ningeb al kura Doyan Al Kurunyen bingeya wainya nene henya Doyan Al Kurunyen alya bereya belen dufay hen mata ten hanjen mat ma nurdeya niyyen al gobe Yesu belen ulin misin katen darim wok irde kamyin goyen kari kari iryen geb, Al Kurun belen goke mata bulun minyan yen kinyen. ²⁸ Ningeb al kura Doyan Al Kurunyen bingeya wainya newen yen nuryen

al gobe yingende mataya dufayya kenkela yenen gab niyyen. ²⁹ Munan al kura gwaha ma ten bingeya wainya gobe Doyan Al Kurun kamyin gote tunanen yen ma nurde ga mali niyyen al gobe gote murungem bulun wor po tiyyen. ³⁰ Gwahade geb, den han bana gonbe al kura marbe yulkek han, kurabe garbam minyan, irde kuratinbe kaman gogo. ³¹ Gega nenbe dahade hite yen nindiken kenkela dufay hen mataninin sope irde hitekbe mata bulun gote murungem bulun ma tetek. ³² Gega kurarebe Doyan Al Kurun belen mataninin goke kanduk dunen hiyen. Gwaha ten hiyen gobe megen henya mataninin huwak hen hikeb kame nalu funande mata bulun marya tumnan huginen Al Kurunyen bearar bana hinak yenbe gogo gayenter kanduk dunen hiyen. ³³ Ningeb, kadne yago, Doyan Al Kurun nin dufay hen hen ge gabu irde dula tini yenbe kadam doyan gird ten hinayin. ³⁴ Al kura bingeb irkeb yaminde dula ten gabe Doyan Al Kurun nin dufay hen hen dula gabure wayyen. Gogab den gabu irde hinayin bana gon mata bulun Al Kurun belen goke murungem bulun duntek goyen ma forok yiyyen. Be, Doyan Al Kurun nin dufay hen hen ge dula ten ten mata nin dinhem. Mata goke mere ma dirhem kura han gobe kame den hitte kun gab momon diren.

12

Holi Spirityen saninde mata forok yen yen

¹ Be, kadne yago, Holi Spirityen tarende mata forok yen yen goke momon diren tihim. Holi

Spirityen tarende mata forok yen yen goke bebak ma titinde po hinak yen igin ma nurde hime geb, kenkela bebak tinayin. ² Be, denbe hakot Yesu ma nurde unen hin hanyabe megen nin det tonej al belej po yirtin binfut minmonj gote yufukde hen huginenj dolonj yirde hinhan gobe nurde hanj gogo. ³ Ningeb ga kenkela nurnan ko. Al kura Holi Spirit minyanj belej epte ma, “Yesube Al Kurunj belej karan urwonj,” yiyyen. Irde al kura Holi Spirit minmonjbe epte ma, “Yesube Doyanj Al Kurunj,” yiyyen. Holi Spirit minyanj al belej po gab epte gwaha yiyyen.

⁴ Be, Holi Spirityen sanjinde mata forok yen yen gobe budam kurayen kurayen hanj gega, mata gote minj albe Holi Spirit, yen unjurenj po. ⁵ Doyanj Al Kurunjen metenbe budam hanj gega, meten gote minj albe Doyanj Al Kurunj, yen unjurenj po. ⁶ Irde metenj tenj tenj tarej wor kurayen kurayen hanj gega, metenj titek tarej gote minj albe Al Kurunj, yen unjurenj po. Yen belej po gab nenj tumnanj metenminj kurunj goyen igin tenj hitek sanjin goyen dunen hiyen.

⁷ Be, nenj dunjurenj dunjurenj hitte Al Kurunj belej Holi Spirityen tarej kawan forok irde hi gobe nenj tumnanj tarej dird dird ninj gogo forok irde hiyen. ⁸ Al kurabe Al Kurunj belej Holi Spirit hitte mat dufay wukke yunen hiyen. Munanj al hoyanj kurabe Holi Spirit unjurenj goyen hitte mat po Al Kurunjen dufay banare ninj goyen yunen hiyen. ⁹ Irde al kurabe Holi Spirit unjurenj goyen hitte mat po Yesu ninj hekkenj wor po nurtek sanjin go yunen hiyen. Irde al hoyanj kurabe Holi Spirit

goyen hitte mat po al garbam minyañ sope yird yird tareñ yuneñ hiyen. ¹⁰ Irde al kurabe mata tiñeñ tonñeñ yañ wor po forok yird yird tareñ yuneñ, al hoyañ kurabe Doyañ Al Kurunyen mere basañ heñ heñ mar yirde hiyen. Munañ al kurabe mataya mereya kura keneñbe gobe Holi Spirit hitte mat watiñ ma unğura hitte mat watiñ goyen bebak teñ teñ sañiñ yuneñ hiyen, irde al hoyañ kurabe naña hoyañde niñ mere kurayen kurayen yinğeñbe go ma nurtiñ mere teñ teñ tareñ yuneñ hiyen. Munañ kurabe mere hoyañ mat yekeb mere gote miñ tagal tagal tareñ yuneñ hiyen. ¹¹ Mata gwahade forok yeñ hanjen kurun gobe Holi Spirit, yeñ unkureñ gote meten. Holi Spirit hoyañ gam moñ. Yeñ beleñ sañiñmiñ kurayen kurayen goyen dufaymiñ po gama irde neñ gayen nende gigen forok yird dunen hiyen.

Neñbe hoyañ hoyañ gega, Holi Spiritbe unkureñ

¹² Be, al uliñ piginbe unkureñ gega, haniñ, kahañ, kirmiñ, muruñ gwahadem yañ hañ. Irde haniñ, kahañ, kirmiñ, muruñ gwahade hañ gore gab al uliñ pigin unkureñ forok irde hi. Niñgeb Yesu Kristu wor gwahade yara geb, neñbe yende kahañ, haniñ, kirmiñ, muruñ gwahade hite. ¹³ Neñbe al miñ hoyañ hoyañ. Kurabe Yuda mar, kurabe Grik mar. Irde kurabe al yufukde heñ muruñgem moñ meten teñ hañ mar, kurabe dufaymiñde kuñ hañ mar. Goyenbe neñ tumñañ Holi Spiritde baptais dirke Yesu Kristuyen uliñ pigin yara hitiñ. Irde Holi Spirit, yeñ unkureñ gore po neñ dunkureñ dunkureñ bana hi. Holi Spirit hoyañ gam moñ.

¹⁴ Al uliņ pigiņbe det uņkureņ beler po ma irtiņ hi. Kahaņ, haniņ, kirmiņ, muruņ gwahade gore irke gab al uliņ pigiņ uņkureņ hitiņ. ¹⁵ Goyenbe al kurat kahaņ beler, “Nebe al gate haniņ moņ geb, al gate uliņ moņ,” yiyyeņbe kahaņ gob al gote uliņ pigiņde ma hiyeņ? Moņ, epte moņ. Yeņbe al gote kahaņ geb, uliņde po hiyeņ. ¹⁶ Gwahade goyen po al kurat kirmiņ beler, “Nebe al gate diliņ moņ geb, al gate uliņ moņ,” yiyyeņbe kirmiņ gobe al gote uliņ pigiņde ma hiyeņ? Moņ, epte moņ. Yeņbe al gote kirmiņ geb, uliņde po hiyeņ. ¹⁷ Niņgeb ulniņiņ gayen dilniņiņ ala po manhan daha mat mere nurde hitewoņ? Irde ulniņiņbe kirmiņniņiņ ala po manhan daha mat det hamiņ nurde hitewoņ? Gobe kukuwamņeņ wor po. ¹⁸ Goyenbe Al Kuruņ beler dufaymiņ gama irde al ire yeņbe kahaņya haniņya yirde kirmiņya diliņya manaņ yirde al uņkureņ iryiņ. Niņgeb neņ wor gwahade po diriņiņ. ¹⁹ Gega det uņkureņ beler po al irtiņ manhan uliņ pigiņbe dahade hiwoņ? ²⁰ Gega gwahade moņ. Ulniņiņde det hoyaņ hoyaņ yirde ulniņiņ pigiņ uņkureņ po irtiņ.

²¹ Niņgeb al kurate diliņ beler al gote haniņ keneņbe epte ma, “Nebe geya hitek ma nirde hi,” inyeņ. Tonaņ beler kahaņ keneņbe epte ma, “Nebe geya hitek ma nirde hi,” inyeņ. ²² Gwahade yarabe ulniņiņde det kura yeneņmiņbe meter miņmoņ yeņ nurde hitek goyenbe go ma hinayiņbe ulniņiņbe keņkela ma meter teņ hiyyeņ. ²³ Niņgeb ulniņiņde det kura yeneņmiņbe meter miņmoņ yeņ nurde hityen goyen det kuruņ yeņ keņkela doyaņ yirde

hityen. Irde ulniniñde det kura yeneñmiñbe igiñ mon gega, keñkela po umña yirde doyañ yirde hityen. ²⁴ Goyenbe ulniniñde det kura yeneñmiñ igiñ gobe umña ma yirtek wor igiñ. Niñgeb Al Kurunbe ulniniñde det kura miñ miñmon yirtin yeneñ hanyen goyen meten kura yune yeñbe go wor yade ulniniñde niñ det hoyanya gabu irde uliñ pigin unñkuren iryin. Al Kurunbe gwaha mat ulniniñde det kura miñ miñmon yeñ yeneñ hanyen goyen turun yirde hiyen. ²⁵ Gogab ulniniñde det kurate dufayya det hoyan kurate dufayya hoyan hoyan heke kahalte bipti ma forok yiyyen. Irde ulniniñde det gore kadom ge nurdkakala ten hinayin. ²⁶ Niñgeb ulniniñ kurhan kura misiñ katyen gobe ulniniñ pigin kurun go tumñan misiñ nuryen. Gwahade goyen po, ulniniñ kurhan kura denem turun yan hen aman hekeb ulniniñ pigin kurun go manan tumñan aman hiyyen.

²⁷ Be, gwahade goyen po, denbe Yesu Kristuyen uliñ pigin yara. Den dunñkuren dunñkurenbe Yesuyen kahan, haniñ, diliñ, kirmin gwahade yara. ²⁸ Niñgeb den Yesuyen alya bereya sios han bana gon mehenbebe Al Kurun belen Yesuyen mere basan mar aposel basiña yirtin han. Irde go yufukdebe Al Kurunyen mere basan mar porofet basiña yirdeb Al Kurunyen mere saba mar basiña yirtin han. Irde gab mata tiñen turun yan forok yird yird mar basiña yirdeb al garbam minyan sope yird yird mar wor basiña yirdeb al faran yurd yurd mar basiña yirtin han. Irdeb Yesuyen alya bereya doyan yird yird mar basiña

yirdeb naŋa hoyande niŋ mere kurayen kurayen go ma nurtiŋ goyen mere teŋ haŋ mar basaŋa yirtiŋ haŋ. ²⁹ Niŋgeb deŋ tumŋaŋbe aposel henayiŋ? Ma, tumŋaŋ porofet henayiŋ? Irde deŋ tumŋaŋ Al Kurunyen mere saba mar henayiŋ? Ma, tumŋaŋ mata tiŋeŋ turŋuŋ yaŋ forok yird yird mar henayiŋ? ³⁰ Deŋ tumŋaŋ al garbam sope yird yird mar henayiŋ? Ma, tumŋaŋ naŋa hoyande niŋ mere go ma nurtiŋ goyen teŋ teŋ mar henayiŋ? Irde deŋ tumŋaŋ mere goyen tigiri teŋ al bebak yird yird mar henayiŋ? Epte moŋ geb. ³¹ Goyenbe Holi Spirityen tareŋ kura igiŋ wor po goyen goke momoŋ direŋ tihim geb, deŋ tumŋaŋ mata go teŋ teŋ niŋ kurut wor po yeŋ hinayiŋ. Mata gobe Holi Spirityen tarende mata forok yeŋ hanŋyen hoyaŋ kurunŋ gote folek wor po.

13

Al hoyaŋ niŋ amaŋeŋ nurd yuneŋ yuneŋ mata

¹ Be, ne gayen naŋa hoyande niŋ marte mere kurayen kurayen goyen igiŋ gwaha mat mere tiyeŋ, irde Al Kurunyen miyoŋyen mere mat manaŋ mere tiyeŋ gega, Al Kurunya al hoyanya niŋ amaŋeŋ nurd nurd matanem moŋ kenem nebe heyoŋonya tikiŋde niŋ det ain parwek belen irtiŋ goyen mali po gasa yirke migiriŋ teŋ hanŋyen go gwahade goyen heweŋ. ² Irde Al Kurunyen mere basaŋ heŋ mere teŋ teŋ saŋiŋne yaŋ heweŋ, irde Al Kurunyen mere banare hitiŋ tumŋaŋ nurde dufaymiŋ tumŋaŋ bebak teŋ tagalenŋ, irde Al Kurunŋ niŋ hekkeŋ wor po nurdeb dugu kura

gasuŋ hoyanđe kwa inmeke kuyen gega, Al Kurunya al hoyanya niŋ amanen ma nuren kenem mata gobe duldul ten heŋ. ³ Irde detne tumŋaŋ al det niŋ amu heŋ haŋ mar goyen yunen, irde Doyaŋ Al Kurun gama ird ird niŋ ten al belen kakde kumba nirke kamen gega, kadne niŋ amanen nurd nurd matanem moŋ kenem mata gwaha ten heŋ kurun gote muruŋgem kura ma tewen.

⁴ Be, al kura binde mat wor po kadomya Al Kurunya niŋ amanen nurd unen unen matabe gahade: al gobe kadom kura matamin igin hewon yen doyaŋ heŋ heŋ ge piŋen ma heŋ hiyen. Kurabe kadom igin igin yirde hiyen. Irde kadom kura igin mat hike kenenbe daniŋ ne wor gwahade moŋ yen ma nurde hiyen. Irde ne harhem harhem mata ma tenbe yinŋen ge turuŋ turuŋ ma ten hiyen. ⁵ Irde kadom hitte palap miŋmoŋ mata ma ten hiyen. Irde yinŋen po igin heŋ heŋ belŋen niŋ ma nankenen hiyen, irde aranen bearar ma ten hiyen. Irde kadom belen buluŋ irtin goyen goke dufay ug po ma heŋ hiyen. ⁶ Al gobe mata buluŋ niŋ amanen ma nurde hiyen, irde mere fudinde goke po amanen nurde hiyen. ⁷ Al gobe kanduk yenen hiyen goke mukku ma ten huginŋen taren po heŋ hiyen. Irde Al Kurun niŋ huginŋen hekenen nurde hiyen, irde Al Kurun belen igin niryen yen goke huginŋen doyaŋ heŋ hiyen, irde kanduk yenen hiyen gega taren po heŋ fole yirde hiyen.

⁸ Kadomya Al Kurunya niŋ amanen nurd yunen yunen mata gobe hubu ma hiyyen. Goyen-poga porofet metenbe hubu hiyyen. Irde nana

hoyande niñ mere mat mere ten ten mata goyen wor kamyen. Al Kurunyen dufay bebak ten tagal tagal meten wor hubu hiyyen. ⁹ Gobe gayenter Al Kurunyen dufay tumnan bebak titek epte mon, irde meremin manan tumnan bebak ten basan hen tagaltek epte mon gega, ¹⁰ kame nalu funandebe nen tumnan Al Kurunyen dufayya mereya kenkela wor po bebak titek geb, go mata gobe tumnan hubu henayin dinen hime gago. ¹¹ Mata gwahade forok yiyyen gobe bikken dirin hinhemya dirinde mere ten dufaynebe dirinde dufay po hen hinhem gega kun kun salannen henbe dirinde mataya dufayya gobe yubul po timirin go gwahade goyen. ¹² Irde gayenterbe Al Kurunyen mereya dufayya bebak wor po ma ten hite. Gobe lunen ain parwek beben irtin gore dinsokninin kinnin gega, kenkelak ma kenen hite go gwahade goyen. Goyenbe kamebe dilnininde kadam genen ten hite yara Al Kurunyen mereya dufayya kenkela wor po bebak ten hitek. Ningeb gayenterbe Al Kurunyen mereya dufayya kura mun po bebak ten hime gega, kamebe tumnan bebak tiyen. Goyenterbe Al Kurunjen beben kenkela wor po nurd nunen hiyen gwahade po, ne wor kenkela nurd unen hen.

¹³ Be, yihim gwahade po mata hoyanbe hubu henayin gega, mata karwo kurabe hubu ma wor po henayin. Mata karwo gobe gahade: Yesu nin hekken nurd nurd mata, Al Kurunjen beben igin diryen yen goke doyan hen hen matayabe Al Kurunya kadininya nin amanen nurd yunen yunen mataya gogo. Goyenbe mata karwo bana

goyen folek wor pobe Al Kurunya kadniniya nin amanej nurd yunen yunen mata gogo.

14

Porofet metenya nana hoyande nin mere mat mere ten ten mataya

¹ Ningeb Al Kurunya kadtinya nin amanej nurd yunen yunen mata gobe gama po irde hinayin. Irdeb Holi Spirityen saninde mata forok yen yen goyen goke Al Kurun belen dunwon yen tarej po gusunaj irde hinayin. Gega porofet meten gobe det kurun geb, goyen dunwon wor po yen gusunaj irde hinayin. ² Porofet meten nin wa gusunaj irde hinayin dinen hime gote minbe gahade: al kura nana hoyande nin mere kurayen kurayen ten hiyen al gobe al ma mere yirde hiyen, Al Kurun mere irde hiyen. Yenbe Holi Spirityen tarende mere banare nin goyen ten hiyen. Ningeb meremin goyen al hoyan kura belen bebak titek mon. ³ Goyenpoga porofet meten ten hanj marbe tumnan al sanin yird yird nin mere yirde hanjen. Ningeb kadam kura tarej hen hen ge faran yurde, bin yurum yirde hanjen. ⁴ Be, al kura nana hoyande nin mere ten ten mata ten hiyen al gobe mata gore yingen po tarej irde hiyen. Munan porofet meten ten hiyen al gobe meten gore kadam Yesuyen alya bereya sanin yirde hiyen. ⁵ Ningeb meten gobe nana hoyande nin mere mat mere ten ten mata gote folek. Goke tenbe den tumnan nana hoyande nin mere mat mere ten ten mata ten hiwon yen nurde hime gega, porofet meten nin wa gusunaj

irke dunkeb meten goyen ten hiwon yen nurde hime. Nana hoyande nin mere mat mere ten ten mata gobe mere gote min goyen tigiri ten Yesuyen alya bereya momon yirke taren hetek al minyan hike kenem gwaha tiyyen. Munan hubu kenem hoyande nin mere ten ten mata gote iginenbe porofet meten gote iginen epte ma fole iryen.

⁶ Be, kadne yago, den hitte kun nana hoyande nin mere mat mere tiyenbe daha mat faran duren? Epte mon wor po! Gwahade tiyen gega, Al Kurunyen dufay banare nin nikala nirke kawan momon dird dird mata, Al Kurunyen dufay bebak ten tagal tagal mata, porofet meten goyen ten ten matayabe sabamin tagal tagal mataya goyen gonem mon henya den hitte kun faran duren gobe iginen ma forok yiyyen. ⁷ Gobe tikinde nin det bulelunya gitaya gwahade yara. Gobe binfut minmon gega, al beley kari yirke mere ten hanen. Goyenbe kenkela ma kari yirkeb mereminbe hiburnen geb, tiki damin hen han yen ma bebak tinayin. ⁸ Be, al kura fulenare kun kun nin ten bigul fu iryen gega, kenkela ma fu irke fulena mar kadam beley daha matbe bebak tenbe fulenare kun kun nin gitik tinayin? Epte mon. ⁹ Nin geb gwahade goyen po, den beley mere ten henya nana hoyande nin mere kura kadtin epte ma bebak titek mere mat tinayinbe dahadem kadtin beley meretin nurde bebak tinayin? Epte mon. Gwaha tinayinbe mere gobe dulin lawlaw yen han yen nurnayin. ¹⁰ Fudinde wor po, megenbe nen beley epte ma bebak titek mere kurayen kurayen budam han. Gega mere gobe

tumnaŋ miŋ miŋyaŋ. ¹¹ Goyenbe mere hoyan kura ne belen epte ma bebak titek goyen al kura belen tiyyenbe nebe meremiŋ gote miŋ ma nuren geb, mere ten hi al hittebe al miŋ hoyan hewen. Irde al gobe ne hitte al miŋ hoyan hiyyen. ¹² Gobe den wor gwahade po yen nurde haŋ. Denbe Holi Spirityen tarende mata forok yird yird saŋiŋ tetek wor po nurde hanjen geb, tareniŋ go ten gabe kadtiŋ Yesuyen alya bereya saŋiŋ yird yird niŋ kurut wor po yen hinayiŋ.

¹³ Niŋgeb goke tenbe al kura naŋa hoyande niŋ merere mat mere ten hiyen al gobe mere tiyyen gote miŋ kawan tagal tagal niŋ manaŋ Al Kurun gusaŋaŋ iryen. ¹⁴ Fudinde, naŋa hoyande niŋ merere mat Al Kurun mere iren goya goyenbe tonner mere iren gega, dufaynerbe mere gwaha tihim yen ma nuren. ¹⁵ Niŋgeb daha tiyen? Nebe tonner Al Kurun mere irenbe dufayner wor mere iren. Irde tonner Al Kurun niŋ tikiŋ hewenbe dufayner wor tikiŋ hewen. ¹⁶ Munaŋ denbe tontiŋde po Al Kurun turuŋ irnayiŋbe den haŋ bana goyen al kura meretiŋ bebak ma ten hiyen al gobe den belen Al Kurun igiŋ nurd unen turuŋ irde haŋ goke epte ma faraŋ durde “Fudinde,” yiyyen. Al gobe mere ten haŋ gote miŋ ma bebak ten hiyen geb, gogo epte ma haywan hiyyen. ¹⁷ Denbe Al Kurun mere irde henya igiŋ mat po turuŋ irde hinayiŋ gega, al hoyan meretiŋ bebak ma ten hinayiŋ marbe meretiŋ gore epte ma faraŋ yuryen.

¹⁸ Nebe naŋa hoyande niŋ merere mat Al Kurun mere ird ird matanebe kurun wor po, den ten

hanyen gote folek. Niṅgeb goke Al Kurunṅ igiṅ nurd unej hime. ¹⁹ Nebe gwahade po naṅa hoyande niṅ mere mat Al Kurunṅ mere ird ird mata tareṅ po tanarde himyen gega, Yesuyen alya bereya gabu irde hanyen bana goṅ heṅbe al hoyanṅ beleṅ igiṅ bebak titek mere mat po mere teṅ al saba yirde himyen. Al hoyanṅ beleṅ igiṅ bebak titek mere mat saba yireṅ kurunṅ gobe gote igineṅ miṅyanṅ. Gega naṅa hoyande niṅ mere kadne beleṅ epte ma bebak titek gore po ugunṅ po saba yireṅ gobe igineṅ gam moṅ, miṅ miṅmoṅ wor po hiyyenṅ.

²⁰ Niṅgeb, kadne yago, naṅa hoyande mere mat Al Kurunṅ mere ird ird mataya porofet metenṅ teṅ teṅ mataya goyen teṅ heṅyabe dirinṅ kalak beleṅ dufay heṅ hanyen gwahade ma teṅ hinayinṅ. Goyenbe dirinṅ mamure niṅbe mata bulunṅ teṅ teṅ niṅ ma nurde hanṅ. Niṅgeb bulunṅ teṅ teṅ niṅbe yeṅ yara heṅ hinayinṅ. Gega dufay heṅ heṅtiṅbe al paruwak beleṅ dufay heṅ hanyen yara heṅ hinayinṅ. ²¹ Al kurunṅyen asande naṅa hoyande niṅ merere mat Al Kurunṅ mere ird ird mata goke Doyanṅ Al Kurunṅ beleṅ gaha yirinṅ:

“Ne beleṅ al miṅ hoyanṅ, irde meremiṅ mananṅ hoyanṅ goyen dufay yunmeke mel gayen momonṅ yirnayinṅ.

Gwahade yireṅ gega merene ma nurnayinṅ,” yitinṅ hi.

Aisaia 28:11-12

²² Niṅgeb naṅa hoyande niṅ mere mat mere teṅ teṅ mata gobe Doyanṅ Al Kurunṅ niṅ ma nurninṅ mar hittebe Al Kurunṅyen sanṅinṅ bebak teṅ teṅ niṅ forok yeṅ hanyen. Munanṅ Doyanṅ Al Kurunṅ niṅ dufaymiṅ tareṅ irtinṅ mar hittebe gwahade

mon. Goyenbe porofet meten ten ten matabe Doyan Al Kurun nin dufaymin taren irtin mar hittebe Doyan Al Kurunyen buninen dufay goyen bebak ten sanin hen hen ge forok yen hanyen. Munan Doyan Al Kurun nin ma nurtin mar hittebe gwahade mon. ²³ Goyenpoga Yesuyen alya bereya sios tumnan gabu irde nana hoyande nin mere mat Al Kurun mere irde hikeya al kura Al Kurunyen mere binde taren ma hitin mar ma al kura Doyan Al Kurun nin ma nurtin mar beben wan denenbe daha dinnayin. Kukuwa hahan po ga dinnayin geb. ²⁴ Goyenbe tumnan Al Kurunyen mere basan hen tagalde hikeya al kura Doyan Al Kurun nin ma nurtin mar ma Al Kurunyen mere binde taren ma hitin mar kura beben wan mere go nurnayinbe mere nurnayin kurun goreb mata bulunmin kawan yirde bin yakamkeb, “Fudinde, nenbe mata bulun mar,” yen nurnayin. ²⁵ Al Kurunyen mere basan hen hen mata gore go mar gote dufaymin banare po hitin goyen kawan yiryen. Irkeb mel gore dokolhon yugulun ten Al Kurun dolon irde kawan po, “Fudinde, Al Kurunbe denya hi!” yenayin.

Igin mat Al Kurun dolon ird ird mata

²⁶ Nin geb, kadne yago, gabu irde Al Kurun dolon ird ird mata nin daha yewen? Be, Al Kurun dolon irnin yen gabu irdeyabe al kurabe tikin hiyyen, irde kurabe saba diryen, irde al kurabe Al Kurunyen dufay banare nin goyen ikala irke tagalyen, irde kurabe nana hoyande nin mere mat mere tiyyen, irde al kurabe mere goyen tigiri ten min bebak diryen. Goyenbe mata gwahade

kurun gobe den sios tumnan sanin hen hen ge ten hinayin. ²⁷ Ningeb al kura nana hoyande nin mere mat mere tiye yen nurdeb irawa ma karwo gwahade belen po mere tinayin. Al hoyan kura sopte ma mere tiyyen. Irde kura kame mere tinayin. Wawun unkenende po tumnan mere titin ala ma tinayin. Be, gwaha ten henyabe mere go tigiri ten bebak dird dird al manan hiyen. ²⁸ Munan mere go tigiri titek al minmon kenem mere go titek albe gabu irnayinde gorbe balmin po hiyen. Irde yenya Al Kurunya po balmin mere ten hiriryen.

²⁹ Be, porofet meten ten ten mata gobe al irawa ma karwo belen tagalnayin. Irke al hoyanbe meremin gobe fudinde Al Kurunyen mere ma dahade goyen kenkela dufay henayin. ³⁰ Be, den gabu irde keperde hinayin bana goyen Al Kurun belen dufaymin banare nin goyen al kura ikala irkeb huwarde tagalen tikeb al kura mehende huwarde tagalde hiyen al gobe keperde balmin po hiyen. ³¹ Gwaha ten hinayinbe Al Kurunyen mere banare hitin goyen tagaltek marbe tumnan tagalde hinayin. Gogab kadam saba gird ten tumnan taren hen hinayin. ³²⁻³⁴ Al Kurunbe dufay kenkela ma hen mali mali mata ma ten hiyen. Yenbe bin kamke igin hen hen gote min al. Ningeb Holi Spirityen tarende porofet meten titek al gobe meten goyen igin mat doyan irde meten ten hiyen.

Be, berebe Yesuyen alya bereya gabu irtin bana gon henyabe mere ma ten hinayin. Mata gobe Al Kurunyen dirnen wen Yesuyen alya bereya

belen gwaha ten hanjen. Berebe Yesuyen alya bereya gabu irnayin bana gon epte ma mere kawan tagalde hinayin. Gwaha titnenbe Moseyen sabare yitin gwahade po, Yesuyen alya bereyat doyan marte mere nurde gama po irde hinayin. ³⁵ Munan mere ma mata kura goke gusunon hinin yen nurdeb yaminde kun gab un yago gusunon yirde hinayin. Bere belen Yesuyen alya bereya gabu irtin dilin mar huwarde kawan po mere ten ten mata gobe memyak. ³⁶ Ga dinen hime gabe den Korin mar belen, “Al Kurunyen merebe nen hitte mat forok yirin,” yen hanjen, irde, “Al Kurunyen merebe nen mun po ga nurtin,” yen hanjen yeke nurmin geb, gago dinen hime.

³⁷ Be, al kura yingen ge yen, “Nebe porofet,” yen nurde hi, irde kurabe, “Holi Spirityen saninde mata forok yen yen tarenm yan,” yen nurde hi kenem al gobe ne belen den hitte asan ga kan saba dirde hime gayenbe Doyan Al Kurunyen mere tarej yen nuryen. ³⁸ Munan al gore mere ga nurde ma nurhem nurhem ten wasak po ten hiyenbe Doyan Al Kurun wor gwahade po iryen.

³⁹ Ningeb, kadne yago, Al Kurunyen mere basan hen tagaltek wor po nurde hinayin. Irde nanon hoyande nin mere mat Al Kurun mere ird ird mata goke utan ma yirde hinayin. ⁴⁰ Goyenpoga mata go ten henyabe huginen igin mat mata ten hinayin. Irde al mali mali huwarde hiburnen ma ten hinayin.

15

Yesu kamyinde mat huwaryin

¹ Be, kadne yago, hanƙapya Yesu niƙ yitiƙ mere igiƙ goke deƙ hitte tagaltiƙ goyen bitiƙ bak yeƙ yeƙ ge sopte momoƙ direƙ yeƙ nurde hime. Deƙbe mere igiƙ gayen nurde goke dufaytiƙ saƙiƙ yirtiƙ haƙ, irde mere go po gama irde tareƙ po huwarde haƙ. ² Niƙgeb mere igiƙ ne beleƙ deƙ hitte tagalmiriƙ goyen tareƙ po tanarde bada ma heƙ gama po irde hinayiƙbe mere igiƙ go hende po saƙiƙ heƙ hike Al Kuruƙ beleƙ dumulgaƙ tiyyeƙ. Gwaha ma teƙ hinayiƙbe dufaytiƙ yeƙ ge tareƙ irtiƙ gobe miƙ miƙmoƙ hiyyeƙ.

³ Ga diƙeƙ hime gabe mere kuruƙ Doyaƙ Al Kuruƙ beleƙ momoƙ nirtiƙ goyen basaƙ heƙbe momoƙ dirmiriƙ geb, gago sopte diƙeƙ hime. Mere gobe gahade: Yesu Kristube Al Kuruƙyeƙ asaƙde katiƙ gwahade po, nende mata buluƙ niƙ teƙ kamiƙiƙ. ⁴ Irke mete tiyamiƙ. Gega Al Kuruƙyeƙ asaƙde katiƙ gwahade po, kamiƙiƙde mat yereƙkeƙ hekeƙ huwariƙiƙ. ⁵ Irde Pita hitte forok yeƙ gab Komatmiƙ 12 hitte forok yiriƙ. ⁶ Be, go kamereƙ wawuƙ uƙkureƙde alya bereya 500 folek gwahade, yeƙ gama irde hinhan mar diliƙde forok yiriƙ. Go mar goyen kurabe kamaƙ gega, budambe haƙ. ⁷ Be, Yesube mel go hitte forok yeƙ gabe Yems hitte forok yiriƙ. Irdeƙ mere basaƙ marmiƙ aposel tumƙaƙ hitte forok yiriƙ. ⁸ Be, neƙ aposel hitte forok yeƙ hinhin goyen ne hittebe funaƙ wor po forok yiriƙ. Nebe diriƙ kura kawaƙ heƙ heƙ nalu hako hikeya kukuwamƙeƙ kawaƙ hitiƙ yara al keƙkelak moƙ gega, ne hitte wor forok yeke delner kinmiriƙ.

⁹ Nebe aposel gega, deƙne turuƙuƙ yaƙ moƙ.

Goyenbe aposel hoyañbe denem turnuñ yañ, ne folek wor po. Niñgeb al hoyañ beleñ ne gayen aposel nintek ma hime yeñ nurde hime. Gobe Al Kurunyen sios goyen buluñ buluñ yirde hinhem geb, gago dinen hime. ¹⁰ Goyenpoga Al Kurun beleñ buninen nirde igin igin niryin geb, gayenterbe al gahade heñ metenmin teñ hime. Yeñ beleñ buninen nirde igin igin niryin gote iginenbe kurun wor po. Niñgeb nebe gogo yeñ ge teñ meten kurun wor po teñ hinhem. Aposel hoyañ beleñ meten titin gote folek wor po meten teñ hinhem. Goyenbe nigen tarende ma meten gwahade teñ hinhem. Al Kurun beleñ buninen nirde igin igin nirkeb gogo go hende huwarde meten teñ hinhem. ¹¹ Niñgeb ne manañ, aposel hoyañ manañ tumñañ mere igin goyen tagalde tukun hinhet. Irke den beleñ nurde mere igin goke dufaytin sanin iramin.

Al kamtinbe huwarnayin

¹² Goyenpoga den hañ bana goyen al kurabe mere igin goyen buluñ mat tagalde hañ. Neñ beleñ Yesu Kristu kamyinde mat huwaryin goke tagaltirin gega, dahade niñgeb go mar gobe al kamtinbe epte ma huwarnayin yeñ hañ? ¹³ Al kamtinbe epte ma huwartek manhan Yesu Kristu wor go ma huwarwon. ¹⁴ Irde Yesu Kristu huwaryin mon manhan goke tagalde hityen gobe min minmon hewon. Irde goke dufaytin taren irtin go wor min minmon hewon. ¹⁵ Irde al kamtin sopte huward huward mata gam mon manhan Al Kurun beleñ Yesu Kristu isan ma hewon. Goyenbe Al Kurun beleñ Yesu Kristu

isañ hiriñ goke neñ belen tagalde hityen geb, meten Al Kurun belen ma tiyyin goyen usi ten al hoyan momon yirde hite yen nurtewon. ¹⁶ Al kamtin huwarnayin mon manhan Yesu Kristu wor kamyinde mat ma po huwarwon. ¹⁷ Irde Yesu Kristu huwaryin mon manhan goke dufaytin taren irtin go wor min minmon hewon. Irde gayenter wor mata bulun bana po hiwon. ¹⁸ Irde yen ge dufaymin sanin irdeya ga kamtin mar wor mata bulun bana po henya kaman geb, Al Kurun hitte epte ma kuwon. ¹⁹ Yesu Kristu belen hen heñninin igin ird ird gobe megen gar hitekeya po igin iryen yen goke doyan hen hityen manhan al buninon wor po hetewon. Irde al buninon megen gar han gote folek bulun wor po hetewon.

²⁰ Goyenpoga Yesu Kristube kamtinde mat huwardeb al kamtinde mat kame huwarnayin kurun gote min al hiriñ geb, al kamtin mar goyen wor kame huwarnayin. ²¹ Al unjukan belen mata bulun min urke kamde kamde mata forok yirin. Niñgeb gwahade goyen po, kamtinde mat huward huward wor al unjukan belen min uryin. ²² Adam belen mata bulun min uryin geb, yen kamere forok yitin marbe tumnon kamde hanen gwahade po, Yesu Kristu belen kamtinde mat huwaryin geb, al hoyan wor kamtinde mat huwarnayin. ²³ Goyenbe kamtinde mat mali mali ma huwarnayin. Yesu Kristube yen wa bikken kamtinde mat huwaryin. Be, kun kun yen sopte mulgan hen wan wan nature alya bereyamin wor huwarnayin. ²⁴ Go kamereb nalu funan wor po

forok yiyyen. Goya goyenbe Yesu Kristu belen Sanyen tarenya megen nin doyan marte tarenya tumnan gwamu yuryen. Irdeb yen belen alya bereyamin doyan yird yird mata goyen Nani Al Kurun hani de kiryen. ²⁵ Mata gobe gahade: Yesu Kristu belen alya bereyamin doyan yirde hiyen. Irke kun kun Al Kurun belen Yesuyen asogom tumnan yuku Yesu kahan minde yerke yufurka tiyyen. ²⁶ Irdeb yen belen gwamu uryen det funanbe kamde kamde mata geb, mata goyen pasi wor po kiryen. ²⁷ Gobe, “Al Kurun belen det tumnan yende yufukde yerke doyan yirde hi,” yitin geb, gwaha po tiyyen. Be, “Det tumnan yende yufukde yerke” yitin mere gobe Al Kurun belen det tumnan yade Yesu Kristuyen yufukde yiryin geb, Al Kurun yingenbe Yesu Kristu yufukde ma hi gobe kenkela wor po nurde hite. ²⁸ Goyenpoga kame det tumnan Al Kurun belen Yesu Kristuyen yufukde yerde pasi iryen nalurebe Urmin Yesu Kristu wor gwaha iryen al Al Kurun yufuk bana hiyen. Gogab Al Kurun belen det kurun gate Doyan Al Kurun hen doyan yirde hiyen.

²⁹ Be, denbe al kamtin nin ten baptais ten hanjen. Goyenbe al kamtinbe ma huwarnayin yen nurde han kenem danin al katmin mar goke baptais ten ten mata ten hanjen? Al kamtinbe epte ma sopte huwarnayin kenem danin geb albe al kamtin mar goke ten baptais ten hanjen? ³⁰ Irde nenbe danin Yesu nin tenbe gise han ka mudunke kamtek kanduk yenen hityen? ³¹ Fudinde, kadne yago, ne hittebe gise han ka

hugiñeñ kamde kamde mata forok yeñ hañyen gwahade yara, gise hañka kanduk yeneñ ulne misiñ kateñ himyen. Ga dineñ hime gabe deñ tumñañ Doyañ Al Kurunñiniñ Yesu Kristuya hañ goke amañeñ nurde himyen geb, gago momoñ dird dird niñ kama ma heñ hime. ³² Ne gayen Efesus taunde niñ mar kulu duwi yara gore buluñ wor po nirke kanduk go fole ire yeñ kurut yeñ hinhem. Goyenbe dufay igiñ moñ megen gar po igiñ heñ heñ ge dufay bener kerde gwaha timiriñ manhan matane gore da igiñ forok irde nunwoñ? Hubu wor po. Al kamtiñ epte ma sopte huwarnayiñ kenem, “Gisebe kamtek. Niñgeb dula teñ kukuwa fe nene amañ po hiniñ,” yewen. ³³ Goyenbe gwahade moñ geb, usi mere goyen fudinde yeñ ma nurde hinayiñ. Kadtiñ kura mata buluñ teñ hañ gore matatiñya dufaytiñya igiñ goyen buluñ yirnayiñ geb, gago dineñ hime. ³⁴ Niñgeb keñkela dufay heñ mata buluñ ma teñ hinayiñ. Deñ hañ bana al kurabe Al Kurun keñkela ma nurd unen hañ. Mere ga dirde hime gabe merene gayen nurde memya henañ yeñ gago dineñ hime.

Al kamtiñde mat huwarnayiñ mar gote uliñbe hoyañ wor po henayiñ

³⁵ Be, goyenbe deñ hañ bana al kura belen, “Al kamtiñbe daha mat huwarnayiñ? Irde huwardeb uliñbe dahade henayiñ?” yeñ gusunañ heñ hañyen. ³⁶ Mere gwaha teñ hañ marbe kukuwamñeñ wor po! Deñ belen det muyken hartin go ma kamyenbe gor mat dahadem det gergeñ forok yiyen? Epte moñ. ³⁷ Det kura

hare yenbe kame forok yiyyen pigin yan gwahade ma harde hanjen. Det gote bilmin, wit muyken ma det hoyan harde hanjen. ³⁸ Goyenpoga Al Kurun belen muyken gote pigin forok yiwi yen nuryen gwahade po forok yen hiyen. Muyken yunuren yunuren gote piginbe hoyan hoyan po forok yirde hiyen ³⁹ Gwahade goyen po, det ulinbe tunande mon, hoyan hoyan. Alyenbe hoyan, megen nin dapna gote ulinbe hoyan, nuyenbe hoyan, irde fete nin dapna gote ulin wor hoyan. ⁴⁰ Irde nanकिनbe gor nin det minyan, irde megenbe gor nin det minyan. Goyenbe nanकिनde nin det buda gote umnaminbe nende gigen hoyan hoyan, irde megen nin det buda gote umnamin wor nende gigen hoyan hoyan po han. ⁴¹ Ningeb nana dilin gote umnambe hoyan, irde gagasi gote umnambe hoyan po. Dinambe han kurun go wor umnambe nende gigen han.

⁴² Be, al kamtinde mat huwarnayin wor gwahade po ulinbe hoyan wor po henayin. Al ulin piginbe bida henayin gega, kamtinde mat huwarnayinbe huginjen hinayin. ⁴³ Irde al hakwambe bida hen bulun henayin gega, huwarnayinbe ulin gob igin mun turun yan henayin. ⁴⁴ Al kamke mete titek hakwam gobe ulin megen nin po gega, sopte huwarnayin gobe Al Kurunyen gasunde nin henayin.

Be, dilnininde yenen hite gayen ulin pigin minyan han kenem Al Kurunyen gasunde nin wor ulin pigin minyan han. ⁴⁵ Goke Al Kurunyen asande, “Hanکاپya wor po al tinjen forok yirin gobe Adam. Yen hitte mat al fuful tiyyin,” yitin

hi. Goyenpoga al hoyan Adam yara kame wor po forok yirin. Yenbe Yesu Kristu, Al Kurunya huginen hej hej goyen al yunen yunen gote min al hirin. ⁴⁶ Al Kurunyen gasunde nin ulinbe go wa ma forok yirin. Megen nin ulin wa forok yeke gab Al Kurunyen gasunde nin ulin gogo kame forok yirin. ⁴⁷ Al hanƙapya wor po forok yirin gobe Al Kurun belen megen nin mulowo po yade forok iryin. Gega al kame forok yirin Yesu Kristube Al Kurunyen gasunde mat forok yirin. ⁴⁸ Adam ulinbe megen mat forok yirin gwahade po, megen han marte ulinbe Adamyen ulin gwahade minyan han. Gega al kura Yesu Kristuya han marte ulinbe kame kamtinde mat huwarde Al Kurunyen gasunde han mar gote ulin yara henayin. ⁴⁹ Gayenterbe neƙ gayenbe megen nin al Adam yara hite. Gega kamebe Yesu Kristu Al Kurun hitte mat watin gwahade hitek.

⁵⁰ Be, kadne yago, mere diren tihim gobe gahade: neƙ ulninin megen po yirtin gayen manan henyabe epte ma nalu funande Al Kurun belen alya bereyamin doyan yird yird bana goƙ hurkunayin. Ninƙeb det bulun hej hubu hetek gore epte ma det huginen hitek bana goƙ hinayin. ⁵¹ Ninƙeb mere banare hitin goyen momon diren tihim geb, kenkela nurnan ko. Merebe gahade: neƙ kurun gayen tumnan ma kamtekeya nalu funan goyen forok yiyyen. Kurabe kamnayin, munan kurabe go ma kamnayin. Gega nalu goyenterbe kamnayin marya go ma kamnayin marya goyen tumnan ulninin hoyan wor po henayin. ⁵² Goyenterbe nalu funande nin bigul

mere tikeb goyare po ulniniḅe hoyañ wor po hiyyeḅ. Bigul go mere tikeb al kamtiḅ marbe huwarde uliḅ gobe sopte buluḅ ma heḅ hugiḅeḅ igiḅ po hinayiḅ. Irke neḅ kurabe ma kamdeya ulniniḅ hoyañ hiyyeḅ. ⁵³ Gobe megen niḅ ulniniḅ bida hetek gabe yubul teḅ ulniniḅ bida ma hetek goyen yawartek geb, gogo ulniniḅ hoyañ hiyyeḅ. Ulniniḅ belḅeḅ hitek gabe kame ulniniḅ hugiḅeḅ hitek hiyyeḅ. ⁵⁴ Ulniniḅ bida heḅ belḅeḅ po hitek goyen yubul teḅ ulniniḅ gergeḅ bida ma heḅ hugiḅeḅ hitek goyen yawartek goke Al Kurunḅen asaḅde katiḅ mere gobe fudinde. Mere gobe gahade:

“Kamde kamde matabe hubu hiyuḅ. Neḅbe mata go fole irtiḅ.” *Aisaia 25:8*

⁵⁵ “Kamde kamde mata, gebe epte ma fole di-rayiḅ.

Kamde kamde mata, gebe epte ma dakamayiḅ,”
yitiḅ hi. *Hosea 13:14*

⁵⁶ Be, yitiḅ gwahade po, kamde kamde gote kilibe mata buluḅ geb, mata buluḅ goreb al hitte kamde kamde forok iryiḅ. Moseyen sababe al belḅeḅ epte ma keḅkela gama irtek geb, neḅ al gayen mata buluḅ mar diḅeḅ diḅeḅ tareḅbe sabare gor mat waḅ hi. ⁵⁷ Goyeḅpoga neḅbe Doyañ Al Kurunḅiniḅ Yesu Kristuya hitekeb Al Kurunḅ belḅeḅ mata buluḅya kamde kamdeya fole yird yird saḅiḅ duniyiḅ geb, goke igiḅ wor po nurd uneḅ hite!

⁵⁸ Niḅgeb, kadne yago, tareḅ po heḅ yul ma yeḅ hugiḅeḅ Doyañ Al Kurunḅ niḅ meteḅ tareḅ po teḅ hinayiḅ. Deḅ belḅeḅ Doyañ Al Kurunḅ niḅ teḅ

meten ten huginen kurut yen hanjen gobe dilinde min minmon ma hiyyen yen nurde han gogo.

16

Yesuyen alya bereya Yerusalem han goyen faran yurd yurd nin mere

¹ Be, Al Kurunen alya bereya faran yurtek yen hora gabu ird ird nin gusunan niran goke wol hen momon diren tihim. Ne beley Galesia nanare nin Yesuyen alya bereya goyen gwaha gwaha tinayin yinmeke tiyamin gwahade goyen po, den wor mata gwahade po tinayin. ² Ningeb meten ten gote murungem hora yadeb kura pota yirde Sandemin Sandemin yawan gabu yirde hinayin. Hora kurun ten han marbe kurun pota yirde hinayin, munan hora dirnen yade han marbe dirnen pota yirde yawan gabu yirde hinayin. Gogab den hitte kumeke goyare po gab hora gabu yirnin yirnin ma ten hinayin. ³ Be, ne kun forok yemekeb Yerusalem nin sios yuntek hora goyen yen beley ga yukun yunnayin yen al kura yawarnayin. Irkeb ne beley mel gobe al gwahade yen Yerusalem mar nin asan kayen goyen manan yunmeke gab ten kunayin. ⁴ Irde ne wor mel goya tumnan kutek gobe min minyan kenem neya tumnan kutek.

Korin kun kun nin tagalyin

⁵ Be, nebe Masedonia nana beley kun kun nin dufay hen himyen geb, bana gore mat kun kun gab den hitte kwen. ⁶ Kun denya ulyande yara hini yen nurde hime. Irde menje huwarde nana bulun hiyyen nalure goyen manan gor po hen

wet yeŋ nurde hime. Go kamere gab goŋ kura kwe yeŋ nureŋ goyen faran nurke kweŋ. ⁷ Gobe dulin kuŋ denman kuŋ kuŋ nin ma nirde hikeb gago dineŋ hime. Doyaŋ Al Kurunyen dufay kenem denya ulyande yara hitek yeŋ nurde hime. ⁸⁻⁹ Goyenpoga Efesus taunde garbe Al Kurunyen meten kurun kenkela meten titek goyen forok yeŋ hi geb, gar heŋ meten teŋ Pentekos nalu heke gab deŋ hitte kweŋ. Garbe al budam Al Kurunyen mere fudinde yeŋ nurde han. Goyenbe budambe asogo nirde han.

¹⁰ Be, Timotibe deŋ hitte kuyeŋ. Niŋgeb deŋ beleŋ kenkela faran urde hikeb denya heŋ heŋ ge kafura ma hiyyeŋ. Yeŋ wor ne teŋ hime yara Doyaŋ Al Kurunyen meten teŋ kuŋ hi. ¹¹ Niŋgeb palap po irde hinayiŋ. Irde yeŋ beleŋ ne hitte mulgan heŋ waŋ waŋ nalurebe hantiŋ yerde unen guram irde tareŋ irdeb tubul tike biŋ kamkeya wayyeŋ. Nebe Timoti goyen gor nin Yesu nurd untiŋ mar kura goya wanayiŋ yeŋ doyaŋ heŋ hime.

¹² Be, kadne Apolosbe kadomya deŋ hitte kunayiŋ yeŋ ineŋ teban irde himyen gega, kutek ma irde hiyen. Goyenbe kutek nalu kura forok yeke gab kuyeŋ.

¹³ Be, denbe kenkela heŋ ga hinayiŋ. Irde Doyaŋ Al Kurun nin hekkeŋ nurdeya hinayiŋ. Irde kafura ma heŋ tareŋ po heŋ hinayiŋ. ¹⁴ Irde meten teŋ hinayiŋ kurun gobe bitiŋde hugiŋeŋ al hoyan nin amanen nurd nurd dufay goyen hikeya ga meten teŋ hinayiŋ.

¹⁵ Be, denbe Akaia nanja bana goŋ nin albe

Stefanasya yenya hanjen marya gore wa Yesu nin dufaymin sanin irdeb Al Kurunjen alya bereya hoyan faran yurd yurd meten goyen tiniy yen nurde meten ten hanjen gobe nurde han gogo. Nin geb, kadne yago, denbe ¹⁶ mel goyen tumnan palap yirde hinayin. Irde al kura yen meten ten hanjen gwahade meten ten hike yenenbe go wor palap yirde hinayin. ¹⁷ Nebe Stefanasya Fotunatusyabe Akaikusya wake neya hite goke amanen nurde hime. Den denmewon wor po yen nurde himyen goyenpoga, mel ga wan forok yekeb tumnan denhem yara nurdeb aman hen hime. ¹⁸ Yenbe denya hen faran durde hike bitin kamke hinhan gwahade goyen po, wan gar ne wor gwahade po nirde han. Nin geb denbe al gwahade goyen palap yirde hinayin.

Mere funan

¹⁹ Be, Esia* nanan bana nin sios neya hite mar belen den ge dufay hen han goyen momon yirayin ninkeb gago dinen hime. Irde Akwilaya berem Prisilayabe yaminde gabu irde Doyan Al Kurun dolon irde han marya belen wor den ge ug po dufay hen han geb, gago bebak dirde hime. ²⁰ Irde Yesu nurd untin mar hoyan gar han wor tumnan den ge dufay hen han geb, gago momon dirde hime. Denbe kadom gargar gird ten henyabe bitin bana mat fudinde wor po kadom gargar girde ten hinayin. Gobe Al Kurun dilinde wukke wor po geb.

* **16:19:** Esia nanan gobe gayenter nin Esia nanan kurun goke ma yitin. Gayenterbe Turki inen hanjen.

²¹ Be, funanbe nigeŋ hanner wor po deŋne gahade kaŋ asaŋ ga paŋi ireŋ tihim – PŌL.

²² Be, al kura Doyaŋ Al Kuruŋ niŋ amaŋeŋ ma nurd uneŋ haŋ marbe Al Kuruŋ beleŋ karan yurke buluŋ wor po henayiŋ. Doyaŋ Al Kuruŋniniŋ, araŋeŋ wayayiŋ!

²³ Be, Doyaŋ Al Kuruŋ Yesu beleŋ bunineŋ dirde igiŋ igiŋ dirwoŋ yeŋ nurde hime.

²⁴ Neya deŋyabe Yesu Kristuya tumŋaŋ hite geb, deŋ ge amaŋeŋ wor po nurd duney hime. Fudinde wor po. Gogo po.

**Al Kurunyen Mere Igin
The New Testament in the Gwahatike Language of
Papua New Guinea
Nupela Testamen long tok ples Gwahatike long
Nuigini**

copyright © 2000 Wycliffe Bible Translators, Inc.

Language: Gwahatike

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-10

PDF generated using Haiola and XeLaTeX on 3 Mar 2023 from source files dated 9 Oct 2020

dbba218f-41f3-5f08-b0b6-2a7c919093ab